

SIAUW NGO GIE

SAMBOENGAN DARI:

„SIAUW NGO GIE”

BAGIAN PERTAMA



BAGIAN KA-DOEA

(TAMAT)

=====
DJILID KA 4
=====

Karangannja :

WEN KUANG LOU

&

FENG MI TAO-JEN



1930

PENERBIT:

N. V. HANDEL MIJ & DRUKKERIJ

— KENG PO — BATAVIA —

STANLEY & CO. GIB

London & New York

1870

Permanently Bound in Cloth

SIAUW NGO GIE.

Bagian ka-doea.

a t a w a

Pembrontakannya Siang Yang Ong.

Baginda keizer tida loepa naekin djoega pangkatnja Kongsoen Tjek, sedeng iapoenja lowongan, djabatan Tjoe-pouw, dikasiken pada Goei Tjiang. Pauw Kong talangin hatoerken trima kasi boewat marika itoe. Samentara Tie Hoa jang tida maoe mendjabat pakerdjahan negri dikasi persen satoe papan merk jang ditoeliskan ampat hoeroef „Kay Sioe le Hong“, jang bermaksoed kabresihan dan kamoeliahannja itoe orang jang dikasi papan poedjian itoe. Salaennja itoe dikasi djoega satoe bahadoeri emas jang tertoeelis doewa hoeroef „Hiape-gi., dan bebrapa banjak emas, perak dan soetra-soetra. Biar poen Tie Hoa sendiri menjingkirken diri, diprentahken satoe ambtenaar boewat bawaken itoe semoewa ka Hongtjioe dan gantoengken di roemahnja Hek-ho-lie.

Keizer ada terangkan djoega bahoewa itoe orang-orang jang dianoegrahken pangkat dan sabaginja di Liongtouw-kok, di hari berikoetnja tida perloe dateng mengadep hanja soeda tjoekoeop menghatoerken trima kasi di loewar pintoe Ngo-boen. Semoewa orang jang memangkoe djabatan dikasiken verlof doewa boelan lamanja boewat poelang ka roemah sembahjang pada laloehoer atawa poen menikah djika jang soeda mempoenjai toendangan.

Kim Hoei, Tihoe di Siang-yang dan Tjongpeng jang mendjaga di itoe afdeeling, semoewanja dinaekin pangkatnja satoe tingkat, Siang-yang-Ong moesti teroes ditjari boewat ditangkep. Barang siapa jang bisa dapet tangkep padanja, bakal dipersen oewang sariboe tael perak dan satoe djabatan Tjian-hou. Sedeng semoewa kambrat-kambratnja Siang-yang-Ong, djika ada jang bisa dapet tangkep, saban satoe orangnja bakal dikasi persen saratoes tael perak. Dan itoe kontjo-

kontjonja Siang-yang-Ong jang soeda tertangkep di segala tempat boleh lantas dikasi hoekoeman mati di itoe tempat djoega tida perloe dibawa lagi ka kota radja. Sasoedanja kaloewarken itoe prentah-prentah, baginda keizer lantas balik masoek ka kraton Hong-yang-kiong dengan doedoek iapoenja djoli terboeka.

Pauw Kong berdjalan kaloewar dari sabelah depan dan naek iapoenja djoli jang menoenggoe di kamar peranti menoenggoe dekat kraton tachta karadjahan, kamoedian ia teroes balik poelang ka Khay-hong-hoe. Di laen fihak, itoe orang-orang poen meninggalken itoe taman radja dan kaloewar lagi dari Tiat-houw-boen dan teroes menoedjoe ka Khay-hong-hoe.

Sasampenja di Khay-hong-hoe, sabagimana biasanja semoewa orang pada hatoerken slamet pada itoe orang-orang jang baroe menerima koernianja keizer, Kong-soen Tjek dan Goei Tjiang poen tida dikatjoewaliken. Sasoedanja itoe baroelah iaorang pergi mengadep pada Pauw Kong.

„Baginda keizer kasi verlof doewa boelan, sasoedanja itoe baroe balik kombali boewat mendjalanken masing-masing poenja djabatan,“ kata Pauw Kong. „Di hari esok, sabagimana keizer soeda prentahken, kaoe orang tida perloe mengadep sendiri boewat hatoerken trima kasi, hanja soeda tjoekoep berboewat begitoe di sabelah loewar pintoe kraton.“

Di pagi jang berikoetnja Pauw Kong toeloeng toeliskan marika itoe poenja request jang menghatoerken trima kasi, sedeng itoe semoewa orang menoeroet sabagimana lebih doeloe soeda dipesen. Pada sasoedanja mengadep ka kraton sabagimana biasanja, Pauw Kong lantas balik poelang ka Khay-hong-hoe. Semoewa orang mengiringken Pak-hiap boewat berdjoempa sama itoe ambtenaar besar dan berpamitan, sebab ia hendak pergi ka gredja Tay Siang Kok doewat potong ramboet dan masoek mendjadi hweeshio.

Pauw Kong meliat pada Auw-yang Tjhoen hatinja merasa tida tega berpisah; tapi baginda keizer sendiri tida bisa menghalangin iapoenja niatan, malah sabaliknja dengan fir-

man keizer ditetapkan ia masoek djadi orang pertapahan. Maka dengan apa-boleh-boewat Pauw Kong memesen soepaja semoewa hauw-wie pergi menganter Auw-yang Giesoe pergi ka gredja Tay Siang Kok.

Pada sasoedanja Pak-hiap membri hormat lagi pada Pauw Kong, ia lantas berdjalan kaloewar dengan dianter oleh kawan-kawannja menoedjoe ka gredja terseboet. Liauw Djian Hweeshio, kapalanja itoe gredja, lebih siang soeda mendapat kabar, maka itoe waktoe ia soeda soeroe moerid-moeridnja boenjiken tamboer dan lotjeng serta memboeka pintoe besarnja itoe gredja. Pak-hiap jang teranter oleh kawan-kawannja teroes masoek ka pertengahan medja sembang bersoedjoet pada Hoet-tjouw kamoedian Auw-yang Tjhoen lantas berloetoet membri hormat pada goeroenja, sedeng laen-laen orang poen membri hormat pada itoe hweeshio.

Liauw Djian Tiangloo lantas merangkep kadoewa tanganja dan menjeboet: „O-mi-to-hoet.“ Itoe waktoe hweeshio terseboet soeda beroemoer saratoes taon.

„Moeridkoe,“ kata ia pada Pak-hiap, „kaoe boleh temenin doeloe pada semoewa Sietjoe boewat omong-omong di sini, akoe maoe masoek ka dalem bersamedia.“

Pak-hiap lantas adjak itoe semoewa orang ka satoe tempat trima tetamoe, tida antara lama kamoedian ada bebrapa banjak hweeshio ketjil jang membawaken thee boewat marika itoe.

„Kita orang moelai dari sekarang berpisahän sama soedara Auw-yang, bila kamoedian kita bertemoe lagi dengan ianja, tida bisa berlakoe lagi sabagimana sekarang,“ kata Tjhio Peng. „Sebab moelai dari sekarang ia soeda menjingkir dari perdjalanän doenia, boewat mejakinken ilmoe jang bisa mendapat soeatoe badan, jang tida bisa djadi roesak boewat selama-lamanja.“

„Soetee, kae poenja omongan itoe terlaloe berat boewat akoe trima,“ djawab Pak-hiap. „Sabetoelnja akoe ini tida mempoenjai peroentoengan bagoes sabagimana kae orang semoewa. Kae orang di hari kamoedian bisa mendapat

pangkat kabesaran jang bisa mengasi perlindoengan pada kae orang poenja anak-istri dan anak-tjoetjoe. Akoe bagaimana bisa dibandingkan sama kae orang?"

„Sekarang soedara satoe kali mendjadi orang pertapahan, tentoe moesti mamegang keras itoe larangan memboenoeh, mentjoeri, mendjoesta dan laen-laen lagi," kata lagi Tjhio Peng, „boekantah benar begitoe, soedara?"

„Benar sekali," djawab Auw-yang Tjhoen.

„Itoe larangan memboenoeh teroetama dilarang memboenoeh djiwanja manoesia, apa soedara bisa tida memboenoeh lagi manoesia?"

„Eh, ada-ada lagi kae poenja pertanjahan, Soetee," kata Pak-hiap. „Djika akoe masi memboenoeh djiwa manoesia, apa namanja mamegang larangan memboenoeh?"

Tjhio Peng lantas tertawa bergelak-gelak.

„Djika kae tida mae memboenoeh lagi orang," kata ia. „Itoe golok bakal apa, boekantah tida bergoena lagi? Doe-loean koetika kae mendapat perkara, Ngai Houw soeda bakerdja aken goena kae, ampir sadja iapoenja djiwa djadi binasa. Blakangan kae poenja perkara mendapat kamenangan dan Ngai Houw mengangkat bapa pada kae, itoe waktoe kae telah berdjandji, apabila kamoedian kae mendjadi orang pertapahan, itoe Tjhit-poo-too aken dikasiken padanja dan sekarang kae soenggoe-soenggoe soeda mendjadi orang pertapahan, itoe golok sama-sekali tida ada goenanja bagi kae, maka haroes sekali ditrimaken pada Ngai Houw."

„Soetee, kae ini senantiasia bisa inget pada perkara jang soeda terdjadi lama sekali," kata Pak-hiap sembari bersedjoem.

„Akoe inget hal itoe djoestroe lantaran orang jang kae djandjiken mengiler satengah mati sama itoe barang jang hendak dikasiken padanja," kata Tjhio Peng sembari tertawa, kamoedian ia berpaling pada Ngai Houw dan menambahkan: „Hei, Ngai Houw, mengapa kae tinggal melongo dan tida mae dateng berloetoet dan mendjoera di hadapan kae poenja ajah-angkat?"

Itoe anak moeda dengan girang lantas berloetoet dan menjodja pada Pak-hiap.

„Nanti doeloe,” kata Auw-yang Tjhoen, „sekarang di hadapan soedara-soedara sekalian akoe maoe menerangkan soeatoe hal, boekannja akoe merasa sajang boewat kasiken ini golok pada Ngai Houw, tapi dari sebab iapoenja oemoer masi terlaloe moeda, akoe sanget koewatir ia salah goenaken ini barang wasiat. Sebab djika sampe kadjadian ia salah goenaken, nistjaja akoe sendiri poen bakal mendapet bahaya katjilakahan jang boekannja ketjil. Tjoema dari sebab Soetee soeda bilang begitoe, memang djoega akoe tida goena simpen ini golok . . .”

Bitjara sampe di sini ia berpaling pada satoe hweeshio ketjil dan menjoeroe itoe orang bikia sedia satoe medja sembajang. Tida lama kamoedian itoe barang soeda disediakan dengan lengkep dan di sebelah pinggirnja ditaroken satoe korsi, sedeng itoe golok ditaro di atas itoe medja sembajang. Pada sasoedanja lilin dipasang dan Pak-hiap pasang tiga bi-dji hio, kombali ia memandang pada orang banjak.

„Akoe harep toewan-toewan sekalian soeka berdoedoek doeloe sabentaran,” kata ia.

Semoewa orang lantas menoeroet dan ingin liat tjara bagaimana itoe golok aken ditrimaken pada Ngai Houw. Itoe waktoe Pak-hiap lantas bersembajang dan lantas tantjepken itoe hio di iapoenja hiolouw, kamoedian ia lantas berloetoet di depan itoe medja sembajang.

„Pada malaekat-malaekat dihatoerken bahoewa akoe, Auw-yang Tjhoen, dapetken ini golok wasiat telah digoenaken memboenoeh boekan sedikit djiwa manoesia, tapi selamanja belon perna goenaken ini golok dengan kliroe. Sekarang maoe dikasiken pada akoe poenja anak-angkat, Ngai Houw, itoelah malaenken tergantoeng atas iapoenja peroentoengan bagaimana achirnja,” begitoelah ia mendoa.

Sasoedanja ia lantas panggil Ngai Houw dan soeroe itoe anak moeda djalanken kahormatan besar, berloetoet dan menjodja sampe doewapoeloh ampat kali, kamoedian Pak-

hiap djoempoet itoe golok dan berdiri di satoe pinggiran.

„Anak,” kata ia, „sekarang akoe pasrahkan ini barang wasiat pada kae; tapi apa kae taoe asal-oesoelnja ini golok?”

„Tida taoe,” djawab Ngai Houw jang masi teroes berloetoet.

„Ini golok telah dibikin atas prentalinja radja Goei Boen Tee, Tjo Pie, di djeman Sam Kok dan namanja jang betoel „Leng Poo”, tapi dari sebat iapoenja oerat-oerat seperti koera-koera sakti, lantas diseboet djoega „Tjhit-poo-too”. Ia bisa bikin batoe giok dan mengiris emas, dan tida perdoeli sendjata apa sadja, satoe kali terbatjok sama ini golok lantas sadja djadi poetoos. Tjoema sadja ini barang wasiat malaenken bisa dipoenjaken oleh orang jang berboedi dan bidjaksana, bagi orang boesoek dan djahat, biar poen bisa poenjaken tapi tida bisa kekal. Maka kaloe sadja kae salah goenaken ini sendjata, nistjaja kae aken mendapat hoekoemanja Thian jang heibat. Lagian lantaran kae poenja oemoer masi tarlaloe moeda dan baroe sadja mengarti selak-seloeknja penghidoepan manoesia, apa kae taoe bahoewa semoewa kadjahatan adalah perkara mengandjoer napsoe birahi ada jang paling heibat dan segala kabaekan malaenken berbakti jang paling teroetama? Kaloe sadja kae kena langgar itoe perkara mengandjoer napsoe birahi, biar poen akoe djoega aken mendapat katjilakahan heibat. Maka apa jang akoe pesen baroesan, kae moesti inget baik-baik dan simpen dalem hati. Sekarang kae moesti bersoempa bahoewa kae tida nanti sembarangan memboenoeh orang-orang jang tida berdosa.”

„Apabilah akoe salah goenaken ini golok,” bersoempa Ngai Houw, „biarlah akoe mendapat hoekoeman disamber gledek.”

Itoe waktoe baroelah Auw-yang Tjhoen trimaken itoe golok pada Ngai Houw, jang lantas berloetoet dan mendjoera pada iapoenja ajah-angkat. Semoewa orang jang berada di sitoe mendenger Pak-hiap poenja omongan,

pada manggoetken kapala dengan tida berkata satoe apa. Kamoedian pada sasoe danja Ngai Houw menerima itoe golok, semoewa orang hatoerken slamet padanja dan ia berloetoet boewat menerima itoe pembrian slamet, tapi tjoema Soe In sendiri sadja jang sabaliknja berloetoet dan mendjoera pada itoe anak moeda. Sebab sabagimana orang taoe, itoe orang ada djadi Ngai Houw poenja moerid.

Sasoedanja itoe oepatjara selesih, itoe medja sembarang lantasi dilaloeken dan satoe sama laen pada mengambil tempat doedoek boewat minoem thee. Ngai Houw koetika gantoenken itoe golok di pinggangnja, hatinja merasa sanget girang dan bangga. Itoe waktoe menoeroet Auw-yang Tjhoen poenja pikiran hendak oendang itoe semoewa orang dahar santapan tjatjay dalem itoe gredja, tapi semoewa orang pada menoelak, kamoedian marika itoe pergi ka blakang boewat katemoeken Liauw Djian Hweeshio boeat berpamitan serta titipken Pak-hiap padanja. Achirnja iaorang berpisah dengan mengoetjoerken aer mata, sedeng Pak-hiap soeda tentoe sadja menganter sampe di loewarnja itoe gredja.

FATSAL XVIII.

Itoe orang-orang teroes balik kombali ka Khay-hong-hoe dan rapportken pada Pauw Kong apa jang soeda terdjadi. Sasoedanja itoe iaorang bitjaraken siapa jang moesti poelang dan siapa jang moesti tinggal di Khay-hong-hoe. In-tiong-ho, Goei Tjin maoe poelang ka gredjanja dan djalan sendirian. Say-tjoe-kiat, Sim Tjong Coan, See Liong, Beng Khay, Tjianw Tjia, Han Tjiang, Han Thian dan Ngai Houw, semoewanja maoe balik poelang ka Go-houw-kauw; Han Thian Kim dan Ngai Houw boewat beresken iaorang poenja oeroesan menikah. Teng Tiauw Lan dan Teng Tiauw Hoei bersama Louw Hong dan Louw Tien dan laen-laennja pergi ka Pek-hwa-nia boewat mengoeroes Louw Tien poenja perkara menikah.

Tji Liang mengikoeti ajahnja balik poelang ka Kie-koan bilangan Sansee boewat sembajangan pada koeboeran leloehoernja. Orang jang laen-laennja djoega pada poelang ka masing-masing poenja kampoeng kalahiran boewat sembajangan marika poenja leloehoer. Tjoema Tjhio Peng dan Tian Tjiauw, lantaran marika poenja koelawarga berdiam di kota radja, maka iaorang tida pergi ka mana-mana, begitoe poen Heng Djoe Liong dan Heng Djoe Houw, kerna tida ada ka-perloeannja djadi iaorang tinggal teroes dalem kota radja.

Tjhio Peng telah menjanggoepin boewat mengambil maitnja marika berdoewa poenja ajah dari gedongnja Bang Tay-soe tjari soeatoe tempat jang baek boewat mengoeboer maitnja Heng Kit itoe.

„Pang Loya, kaeo bagimana ?” menanja Tjhio Peng pada Pang Jan.

„Akoek tida ada koeboeran jang boleh ditjari,” djawab orang jang ditanja.

„Hei, apa kaeo tida mempoenjai koeboeran dari kaeo poenja leloehoer ?

„Akoek tida taoe di mana letaknja,” manerangken Pang Jan. „Sebab sadari moeda sekali akoek poenja kadoewa orang

toewa soeda meninggal doenia. Pada waktoe akoe beroemoer doewabelas tahun akoe berladjar ilmoe silat dan koetika baroe beroemoer ampatbelas tahun akoe soeda masoek dalem golongan lioklim. Kaeo tentoe mengarti orang jang berada di golongan lioklim sama-sekali tida mempoenjai kasempetan boewat memperhatikan perkara koeboeran leloehoer."

"Sekarang kaeo soeda mendjabat pakerdjahan negri, toch haroes sekali kaeo mentjari tae," kata Tjhio Peng.

"Di mana akoe moesti tjari tae?" menanja Pang Jan. "Boewat sekarang terpaksa akoe tjoema bisa membeli hio dan gintjoa boewat bikin sembajangan dari kadjaeohan."

"Itoe betoel djoega," kata Tjhio Peng.

Begitoelah Pang Jan lantas soeroe orang beli hio dan keratas perak, kamoedian sembajangin iapoenja leloehoer di soeatoe tempat jang sepi. Tian Him Hoei dan Tjhio Peng pergi ka gedongnja Bang Taysoe dan katemoeken mandooranja, pada siapa iaorang minta maitnja Heng Kit. Itoe ambtenaar dorna tida bisa menoelak dan soeroe orangnja pergi ka blakang Boen Kong Lauw, jang letaknja di depan Thayouw-tjio. Lantaran ada memake peti mati jang kajoenja baik, itoe pakerdjahan menggali tida soesa dan lantas dikoeboer di soeatoe tempat jang lebih doeloe telah disediakan.

Sasoedanja iaorang lakoeken itoe oeroesan dengen beres, lantas dikasi rapport pada Pauw Kong. Kabetoelan itoe hari Thio Liong dan Tio Houw poen balik poelang ka Khayhong-hoe, pada sasoedanja iaorang pergi tjoetji moeka dan ganti pakean jang bresih laloe iaorang pergi katemoeken Tian Tjiauw dan Tjhio Peng di tempat berkoempoelnja Hauw-wie, begitoe poen jang laen-laennja. Kamoedian Tjhio Peng lantas adjar kenal iaorang sama Pang Jan dan Heng Djoe Liong dan Heng Djoe Houw. Sasoedanja itoe doewa Hauw-wie pergi katemoeken Pauw Kong boewat merapportken iapoenja pakerdjahan, Pauw Kong soeroe Kong-soen Tjek bikin satoe soerat laporan pada baginda keizer, jang pada esokan paginja dihatoerken pada waktoe itoe ambtenaar mengadep sabagaimana biasanja.

Lagi bebrapa hari kamoedian ada hari lahirnja baginda keizer. Koetika hari itoe sampe, semoewa ambtenaar civiel dan militair memake pakean kabesaran jang indah mengha-toerken slamet pada keizer Song Djin Tjong. Pada hari jang katiga, tatkala Pauw Kong baroe balik poelang dari kraton dan maoe masoek ka iapoenja kantoor, kadengeran ada soe-wara riboet-riboet dan Pauw Hin lantas kasi taoe bahoewa ada dateng satoe firman keizer, hal mana membikin itoe ambtenaar djadi heran dan tida bisa mengarti, sebab ia sendiri baroe sadja mengadep pada baginda keizer, mengapa ada satoe firman jang menjoesoel.

„Siapa jang bawa itoe firman?“ menanja ia.

„Tan Tjongkwan Loya,“ djawab itoe boedak.

Pauw Kong lantas taoe tentoe oeroesan dalem kraton, sebab kaloe boekannja oeroesan di dalem kraton, tentoeelah boekannja Tan Lim jang bawa firman itoe. Kabetoelan sekali Pauw Kong masi belon malepaskan iapoenja pakean kabesaran, itoe waktoe djoega ia kasi prentah boewat memboeka pintoe tengah dan pergi menjamboet itoe firman di pertengahan. Tan Lim soeda toeroen dari iapoenja koeda toeng-gangan dan Pauw Kong lantas berloetoet.

„Hamba, Pauw Tjin, mengadep pada djoengdjoengankoe, Banswee Ban-ban-swee,“ kata ia.

„Ini firman moesti dibatja di pertengahan kadoewa,“ kata Tan Lim.

Begitoelah semoewa orang pada masoek ka pertengahan kadoewa.

„Berloetoetlah, firman keizer hendak dibatjaken,“ kata itoe kapala orang kebiri.

Pauw Kong lantas berloetoet kombali. Itoe kapala orang kebiri lantas boeka itoe firman dan membatja :

„Hong Thian Sin Oen Hong Tee membri taoe, samalem pada sasoedanja djam sapoeloch kami telah prentah sediaken kami poenja pakean karadjahan di Keh-ie-tian, persediaan boewat dipake pada esokan paginja. Ini pagi pada sasoedanja bersantap, koetika itoe pakean maoe dimasoekin lagi ka

dalem goedang, ternjata soeda linjap, biar poen pintoe dan djendelanja itoe Keh-ie-tian tida terdapat karoesakan satoe apa atawa poen tanda-tanda bekas terganggu. Belon taoe apa itoe barang ditjoeri oleh pendjahat atawa dari loewar atawa ditjoeri oleh orang-orang dalem kraton. Sekarang itoe kapala pendjaga dari Kei-ie-tian bersama iapoenja orang-orang sabawah dipasrahken pada Khay-hong-hoe boewat dipreksa. Apabila itoe barang ternjata boekannja ditjoeri oleh orang-orang dalem kraton, diprentahken Khay-hong-hoe Hoe-in dengan membawa bebrapa Hauw-wie dateng ka Keh-ie-tian boewat bikin papreksahan.

Sahabisnja itoe „sengtji” dibatjaken, sabagimana biasanja Pauw Kong hatoerken trima kasi dengan menjeboet „Djoeng-djoengkoe Ban-swee Ban-ban-swee, hamba menerima prentah.” Kamoedian itoe firman ditaro di atas satoe medja sem-bajang dan djalanken peradatan sama Tan Lim menoroet sapatoenja.

„Tjongkwan Loya ada baik,” kata Pauw Kong.

Itoe kapala orang kebiri lantas mengakoe kadoewa tangan membales hormat sembari bersenjoem.

„Trima kasi, akoe harep Pauw Siangya poen ada baik,” kata ia.

Kamoedian satoe sama laen mengambil tempat doedoek dan disoegoehi aer thee, tapi pada sabelonnja Pauw Kong boeka soewara lagi, itoe orang kebiri soeda mendoeloein berkata : „Pauw Siangya, apa kae soeda bisa liat doedoeknja perkara? Sadari Pek Ngo-loya sampe sekarang dalem kraton tinggal aman dan tida taoe ada orang bikin riboet lagi; tapi sekarang itoe kariboetan ada terlebih heibat lagi dari doeloean. Sebab itoe Keh-ie-tian tida bisa dibandingkan sama baginda keizer poenja taman boengah, kerna jang doeloean letaknja ada sanget berdeketan sama baginda keizer poenja astana di mana baginda keizer tidoer. Sekarang, apa Siangya maoe preksa doeloe itoe orang-orang jang akoe ba-wa atawa maoe pergi preksa doeloe tempat itoe tempat katjoerian?”

„Akoë rasa lebih baik preksa doeloe ka'adahannja itoe tempat katjoerian,” kata Panw Kong, „sebab kaloe pentjoeri dari loewar, djadi tida perloe mengompes pada marika itoe.”

„Kaloe begitoe, baiklah ; sekarang djoega kita boleh sama-sama brangkat.”

„Pauw Kong lantas kasi taoë bahoewa Tian Him Hoci dan Tjhio Tek Tjiang moesti mengikoet padanja boewat bikin papreksahan. Sedeng itoe penggawe-penggawe kraton jang tadi dibawa oleh Tan Lim, disoeroe poelang doeloe boewat menoennggoë kabar. Tida antara lama itoe bebrapa orang telah sampe di kamar peranti menoennggoë di dalem kraton, Tan Lim adjak Pauw Kong, Tian Tjiauw dan Tjhio Peng masoek ka dalem. Pada sasoedanja iaorang meliwati banjak sekali pintoe-pintoe, baroelah iaorang sampe di itoe Keh-ie-tian.

„Inilah jang dinamaken Keh-ie-tian,” kata Tan Lim sembari menoenndjoek. „Mari mengikoeti akoe boewat bikin papreksahan.”

Tian Tjiauw dan Tjhio Peng tida brani naek ka atas tangga batoenja itoe roewangan, jang mendjadi tempat menoekar pakeannja baginda keizer dan iaorang menoennggoë sadja di sabelah bawahnja tangga itoe. Sedeng Pauw Kong mengikoeti itoe kapala orang kebiri bikin papreksahan di segala podjokannja roewangan, tapi sama-sekali ia tida bisa meliat tanda satoe apa.

„Pauw Siangya,” kata Tan Lim, „kaoe liat ini pendjahat apa orang dari loewar atawa boekan?”

„Ini perkara moesti soeroe Tian Hou-wie dan Tjhio Hou-wie jang menjelidikin baroelah bisa taoë,” djawab Pauw Kong.

„Kaloe begitoe mengapa itoe doewa orang tida maoë ikoet masoek ka sini?”

„Kaloe tida ada firman keizer iaorang tida brani sembarangan masoek.”

„Ah, kae orang terlaloe memake banjak peradatan,” kata Tan Lim, „biarlah gantiken baginda keizer mengaloearken

satoe firman. Atas namanja baginda keizer diprentahken Tian dan Tjhio kadoea Hou-wie masoek ka Keh-ie-tian boeat lakoeken papreksahan!

Itoe doewa orang jang berada di sabelah loewar lantas mendjawab: „Hamba berdoewa menerima prentah,“ dan seabisnja berkata iaorang lantas naek dan masoek ka dalem itoe roewangan, kamoedian iaorang lantas pada berdongak dan mamereksa ka atas lelangit bebrapa lamanja. Itoe doewa orang lantas saling mengawasi dengan bersenjoem. Blakangan kombali iaorang meliat dan mamereksa lagi ka bebrapa tempat sakoetika lamanja.

„Tjongkwan Loya,“ kata itoe doewa orang dengan berbareng. „Ini pendjahat datengnja dari loewar.“

Itoe kapala orang kebiri lantas tertawa berkakakan.

„Siangya,“ kata ia, „djangan kata kae bisa mamereksa perkara di doenia dan di acherat, tapi baroesan kae bikin papreksahan bebrapa lamanja, sedikit poen kae tida bisa mendapet kanjataan satoe apa; sekarang orang laen dengan satoe kali liat sadja lantas bisa mendapet taoe. Kadoewa Hou-wie, bagaimana kae bisa taoe itoe pendjahat dateng dari loewar? Dan ia masoek dengan mengambil djalan dari mana?“

„Itoelah gampang sadja dikatahoei; ia masoek dari palangan pintoe di sabelah atas dan kaloewarnja djoega dari sitoe,“ menerangkan itoe doewa orang.

„Kalo baginda keizer tanjaken apa alesannja atawa boektinja, bagaimana?“

„Tan Tjongkwan kaloe tida pertjaja,“ kata Tian Tjiauw, „boleh soeroe orang pergi mengambil satoe tangga, kamoedian soeroe saorang pergi naek dan dengan satoe kali tarik sadja itoe palangan pintoe di sabelah atas tentoe bisa terlepas. Lagian orang jang soeka berdjalan malem djika masoek dengan mengambil djalan dari palangan pintoe di sabelah atas, selamanja soeka masoek dengan tengkoeroep. Oleh kerna itoe, di laen-laen tempat ada terdapat deboe-deboe jang menempel, tapi di atas palang penahannja itoe pintoe,

ada begitoe bersih. Itoelah tandanja orang soeda masoek dan kaloewar dari sitoe, hingga iapoenja pakean soeda kena sotsot bersih deboc di itoe tempat."

Tan Lim pikir itoe omongan ada mengandoeng kabeneran dan masoek di akal.

„Kalo Tjongkwan soeka perhatikan ini satoe hal," kata Tjhio Peng, „lantas bisa mengarti. Di sini semoea ada ditempin kertas dengan rapet, tapi itoe palangan di atasnja pintoe, tempelan kertas di sakiternja semoewa soeda pada malekat petjah. Tjoba Tjongkwan pikir sadja, kalo boekannja itoe palangan di atas pintoe soeda terboeka, tjara bagaimana itoe kertas bisa pada petjah?"

Tan Lim beroelang-oelang manggoetken kapala.

„Ja, ja, kae poenja omougan ada benar sekali," kata ia.

Itoe waktoc djoega ia lantas soeroe orang pergi mengambil satoe tangga, kamoedian dengen goenaken itoe tangga Tjhio Peng naek ka atas dan tarik itoe palangan di atas pintoe kalo boekannja dipegang dengen kentjeng, nistjaja itoe palangan pintoe soeda djato ka bawah, sebab sabagitoe lekas ditarik, lantas sadja djadi terlepas kerna tida ada barang jang mamegang lagi sabagaimana biasanja. Dan betoel sadja di atas itoe palang penahan tida ada barang sedikit deboc jang menempel, seperti djoega sengadja diseka bresih.

„Soeda tjekoep," kata Tan Lim, „kae boleh toeroen sadja, Tjhio Hou-wie."

Pada sasoedanja itoe tangga dibawa pergi, Tan Lim berkata lagi: „Tjoba sekalian preksa di loewar dari mana itoe pendjahat telah mengambil djalan boevat masoek ka sini."

Tian Tjiauw dan Tjhio Peng lantas menoendjoek dan berkata: „Tjongkwan, tjoba liat, ia masoek dari sini."

Tan Lim liai, dengen sasoenggoenja djoega di sabelah bawanja tembok sabelah Timoer ada terdapat bebrapa banjak boeboek kapoer. Mendadak Tjhio Peng menoendjoek lagi ka satoe djoeroesan laen dan berkata: „Tjongkwan Loya, tjoba kae liat, ini barang apa memangnja ada, atawa baroc sekarang sadja tertampak di sitoe?"

Tan Lim berdongak dan liat di atas pintoe Hong-siang-boen ada berpeta titik-titikan poetih jang meroepaken satoe boengah seroeni berikoet tiga lembar daon dan satoe tangkenja dan itoe semoewa terloekis oleh itoe titik-titikan poetih.

„Doeloean tida ada itoe tanda,“ kata Tan Lim dengan heran.

Pauw Kong poen soeda dapet liat itoe loekisan boengah seroeni poetih, tapi tida mengarti apa sebabnja ada di sitoe. Tjhio Peng dan Tian Tjiauw lantas omong bisik-bisik sakoe-tika lamanja, kamoedian Tian Him Hoei lantas menghamperi dan keboetken tangan badjoenja pada itoe daon pintoe jang ada terdapat itoe loekisan boengah seroeni poetih, dalem sa'at itoe djoega ada bebrapa banjak deboe poetih jang pada melajang di oedara, sedeng itoe loekisan boengah seroeni lantas djadi tida kaliatan lagi. Tian Him Hoei lantas menghamperi pada Pauw Kong.

„Itoelah ada soeatoe tanda jang telah ditinggalken oleh itoe pendjahat, jang telah tjoeri baginda keizer poenja pakean,“ kata ia. „Sasoenggoenja ia itoe ada soeatoe pendjahat jang sanget brani sebab pada sasoedanja mentjoeri dengan sengadja soeda meninggalken itoe matjem tanda, sabagi djoega ia mae kasi taoe siapa orangnja jang soeda melakoeken itoe pertjoerian.“

„Tjongkwan Loya boleh rapportken kasoedahannja kita poenja papreksahan pada baginda keizer,“ kata Pauw Kong. „Akoek apa mendenggoe firman di loewar atawa pada besok pagi sadja pada waktok akek mengadep pada baginda keizer sabagimana biasanja?“

„Itoe hal akek mae hatoerken semoewanja pada baginda keizer dengen terang,“ kata Tan Lim. „Akek harep kaek soeka lekasan prentah orang pergi menangkep itoe pendjahat, sebab itoelah jang paling perloe.“

„Kalok begitok, akek mae poelang ka Khay-hong-hok sadja,“ kata Pauw Kong.

„Ja, baik; sekarang itok penggawe-penggawe kraton kaek

tida perloe lagi preksa iaorang poenja katerangan," kata Tan Lim.

„Dari sebab itoe pentjoeri ada orang loewar, soeda tentoe sadja tida ada perloenja bikin papreksahan pada orang-orang dalem.”

Tan Lim manggoetken kapala dan soeroe bebrapa orang kebiri menganter Pauw Kong dan doewa kawannja pergi ka loewar, sedeng ia sendiri lantas masoek ka dalem astana merapportken apa jang soeda terdjadi pada baginda keizer. Di laen fihak Pauw Kong satelah balik poelang ka Khay-hong-hoe, lantas kasi prentah soepaja Tian Tjiauw dan Tjhio Peng dateng ka ia poenja kamar-batja boewat bitjara.

„Sekarang ini perkara kahilangan pakean, biar poen baginda keizer tida manetakken kapan waktoenja itoe pendjahat moesti tertangkap,” kata Pauw Kong, „tapi sabisanja moesti dengan lekas. Sebab kaloe bisa dapet tangkep itoe pendjahat dengan lekas, bila baginda keizer djadi moerka, nistjaja poenkok djoega aken mendapat gegeran jang, boekan enak.”

Itoe doewa orang beroelang-oelang manggoetken kapala. Pauw Kong lantas gerakin tangan sabagi tanda jang itoe doewa orang boleh berialoe. Begitoelah itoe doewa orang lantas balik kombali ka tempatnja Hauw-wie dan semoewa orang lantas pada menghamperi boewat menanjaken itoe perkara. Tjhio Peng koetika meliat di sitoe tida ada orang loewar, lantas toetoeerken tjara bagimana kasoedahannja itoe penjelidikan di dalem astana. Kamoedian ia kasi prentah pada satoe penggawe dengan berkoeda pergi panggil pada semoewa kapala oppas dari empatbelas district jang berada dalem pegangannja Khay-hong-hoe boewat dateng mengadep. Itoe penggawe lantas brangkat melakoeken itoe prentah.

Soeda tentoe sadja kapala oppas dari Khay-hong-hoe jang paling doeloe dipanggil mengadep. Han Tjiat dan Touw Soen lantas masoek dan berdiri menoenggoe di satoe pinggiran dengan sikap hormat.

„Sekarang akoe panggil kae berdoewa dateng ka sini.”

kata Tjhio Peng, „boleh djadi djoega kae orang masi belon taoe terang lantaran oeroesan apa, maka sekarang akoe mae manerangken lagi satoe kali. Baginda keizer telah kahilangan iapoenja saprangkat pakean karadjahan dan itoe barang di-tjoeri oleh pendjahat dari loewar dan itoe pentjoeri roepanja sanget brani; sebab pada sasoedanja melakoeken itoe pentjoerian, ia lantas bikin satoe tanda dengan satoe tjap jang berlobang dan dalemnja terisi boeboek poetih, meroepaken satangke boengah seroeni berikoet satoe batang dan tiga daonnja, di atas daon-pintoe Hong-siang-boen. Kae orang soeda biasa mengoeroes perkara perampokan dan pentjoerian, apa kae orang taoe itoe pendjahat jang soeda meninggalkan tanda saroepa itoe ada pendjahat dari mana?”

Itoe doewa kapala oppas lantas berloetoet.

„Kita orang sasoenggoenja tida taoe,” kata marika dengan berbareng; „kaloe kita orang taoe sedikit sadja apa-apa jang berhoeboeng sama ini hal, nistjaja kita orang lebih siang soeda hatoer bertaoeken pada taydjin.”

„Kae orang dengan enak sadja boleh bilang begitoe,” kata Tjhio Peng sembari bersenjoem sindir. „Baginda keizer telah kasi tempo anampoeloeh hari boewat bikin terang ini perkara dan Siangya kasi tempo satoe boelan. Maka kaloe sadja ini perkara tida bioa dibikin terang dalem tempo tiga-poeloeh hari, kae orang haroes hati-hati sama toengkat jang bakal merangket pada kae orang. Sekarang kae orang boleh pergi menoennggoe di loewar.”

Disini haroes diterangkan prihal itoe tjap, jang itoe pentjoeri telah goenaken boewat bikin itoe tanda. Biasanja anak-anak sekola soeka bikin samatjem permaenan dari samatjem kantong kertas minjak, di moekanja itoe kantong ditoesoekin sama satoe poesoet tadjem meroepaken satoe koera-koera; kamoedian dalem itoe kantong di'isiken poepoer poetih. Itoe anak-anak goenaken itoe kantong ditepokin pada kawannja poenja bebokong dan lantas sadja di atas itoe tempat jang bekas ditepok meninggalkan tanda titikan poetih jang meroepaken koera-koera. Begitoe poen itoe pekakas jang digoenaken oleh

itoe pendjahat ; tjoema sadja iapoenja bikinan ada lebih rapi dan bagoes, lantaran apa bisa meninggalkan tanda titikan jang lebih njata dan bisa menempel lebih baek.

Itoe waktoe Tjhio Peng lantas berpaling pada Thio Liong, Tio Houw, Ong Tiauw dan Ma Han.

„Toewan-toewan,“ kata ia, „sekarang di sini tida ada orang loewar dan kae berampat asalnja kaloewaran dari golongan lioklim, dengan begitoe, tentoelah bisa taoe pendjahat dari mana jang biasa soeka meninggalkan itoe matjem tanda pada sasoedanja ia melakoeken pakerdjahannja. Djika kae orang taoe akoe sanget harep soepaja soeka mengasi katerangan.“

Tiga dari itoe ampat orang, jaitoe Thio Liong, Ong Tiauw dan Ma Han, satelah mendenger itoe pertanjanan, moekanja semoewa mendadak berubah seperti tjabe dan tida bisa mendjawab ; tapi Tio Houw kaliatannja tida merasa maloe atas itoe oeroesan jang soeda laloe.

„Tatkala kita berampat melakoeken pakerdjahan membegal di Touw-liong-kang,“ kata ia, „itoe kawanang bangsat moeda masi belon dilahirken ; maka djika taydjinnja maoe menanjaken perkara-perkara jang terdjadi pada bebrapa tahun berselang, boleh djadi kita masi bisa taoe djoega bebrapa fatsal. Samentara ini kawanang begal jang moentjoel blakangan, lantaran kita soeda kaloewar dari itoe golongan, soeda tentoe sadja kita tida taoe satoe apa ; kaloe maoe dibitjaraken, marika itoe boleh teritoeng mendjadi kita poenja boejoet !“

Tio Houw poenja omongan jang paling blakang soeda membikin Heng Djoe Liong dan Heng Djoe Houw djadi mendongkol. Marika memandang pada itoe orang jang bitjara dengan moeka merengoet dan mata mendelik.

„Tio Soe-loya, kae tida perloe djadi kakroepoekan,“ kata lagi Tjhio Peng. „Kita poenja nabi bilang : „Apa jang kita taoe boleh bilang taoe dan jang tida taoe djoega boleh bilang tida taoe.“

„Ah, kombali kae kaloewarken itoe pepatah dari Soesie,“ kata Tio Houw, „akoe mana bisa mengarti.“

„Djika memangnja kaeo tida taoe satoe apa, itoelah tida bisa dipaksa. Dan kaeo Pang Toa-loya, bagaimana?”

„Aja, kaloe sadja kaeo taoe, tida perloe kaeo menanjaken lagi, tentoe lebih siang akoe soeda kasi taoe,” kata Pang Jan. „Memang djoega lantaran akoe dari golongan lioklim haroes taoe ka'adahan dalem itoe golongan; tjoe ma sadja akoe teroes-meneroes berdiam di Teng-kee-poo, Pa-ong-tjhung dan paling blakang di Ong-hoe, dalem itoe tiga tempat sama-sekali ada belasan tahon lamanja, dengan begitoe, sekarang perkara di loewaran, akoe sama-sekali tida taoe satoe apa. Apabila akoe taoe dan tida maoe kasi taoe, boleh anggep sadja akoe ini boekannja manoesia.”

„Ach, kaloe memangnja kaeo tida taoe tida perloe ber-soempa,” Tjhio Peng bitjara sampe di sini lantas berpaling pada itoe kadoewa soedara Heng dan berkata lagi: „Heng Toa-loya dan Heng Dji-loya, kaeo berdoewa poen ada ka-loewaran dari golongan lioklim, malah meninggalkan itoe golongan poen masi belon lama, boleh djadi kaeo orang ada denger apa-apa jang berhoeboeng sama ini perkara.”

Itoe doewa orang lantas oendjoek sikap goegoep dan bingoenng.

„Kita orang tida taoe dan sasoenggoenja tida taoe satoe apa tentang ini oeroesan,” kata itoe doewa soedara dengan berbareng.

„Soedara,” menambahkan jang toewahan, „boekantah memangnja kita tida taoe satoe apa tentang ini oeroesan?”

„Ja,” djawab jang moedahan, „memang kita tida taoe satoe apa. Akoe harep sadja taydjin djangan menjangka kita taoe, tapi tida maoe tjeritaken. Soenggoe mati, kita orang memangnja tida taoe.”

FATSAL XIX.

Tjhio Peng meliat itoe doewa orang poenja sikap begitoe roepa, lantas soeda mengarti, tapi ia poera-poera berkata : „Kaoe berdoewa kaloe betoel tida taoe, tida perloe djadi iboek, kita orang boleh selidikin sadja dengan soenggoe-soenggoe, boleh djadi dengan psrlahan kita aken bisa mendapet katerangan.“

Semoewa orang tentoe sadja bilang baek, Kamoedian Tjhio Peng kasi prentah Han Tjiat dan Touw Soen, apabila itoe kapala-kapala oppas dari semoewa district jang termasuk di bawah prentahnja Khay-hong hoe dateng, itoe doewa orang boleh kasi taoe itoe perkara dengan terang dan kasi tempo dalem satoe boelan itoe perkara soeda moesti diselidikin dengan terang. Sahabisnja mamerentah, Tjhio Peng lantas tarik Tian Lam-hiap dan diadjak pergi masoek ka dalem roemah tinggalnja jang terseboet blakangan. Semoewa orang jang bakerdja di Khay-hong-hoe, masing-masing ada mempoenjai roemah tinggal jang terpisa. Itoe kadoewa soedara Heng tinggal di roemah jang teridar tembok di sebelah Timoer, sedeng Thio Liong, Tio Houw, Ong Tiauw dan Ma Han memake satoe petak di sebelah Timoer djoega dan Pang Jan berdiam di satoe roemah samping. Itoe semoewa orang pada balik poelang ka masing-masing poenja tempat tinggal, sedeng Tian Tjiauw bersama Tjhio Peng satelah sampe di tempat jang ditoedjoe, orang jang terseboet blakangan lantas berkata :

„Tian Toa-tec, apa kaoe dapet liat bagimana sikapnja itoe doewa soedara Heng?“

„Tida, akoe tida liat apa-apa,“ djawab orang jang ditanja. „Tapi, Sie-ko, kaoe dapet liat itoe doewa orang poenja sikap bagimana?“

„Akoer doega keras itoe doewa soedara ada taoe apa-apa dalem ini oeroesan.“

„Ach, Sie-ko, djangan soeka sembarang toedoech orang.“

„Tida, akoe tida sembarang toedoech orang. Kaoe sendiri

poen tentoe soeda bisa liat bagaimana sikapnja itoe doewa orang koetika ditanja oleh akoe dan tjaranja iaorang mengasi katerangan. Akoe rasa kae poen tentoe soeda taoe apa-apa, sama akoe boewat apa kae berlaga pilon."

Tian Tjiauw jang djoedjoer, sekalipoen tadinja ia merasa tida tega, itoe waktoe tida bisa berlaga bodo lebih lama, maka ia lantas berkata sadja: „Abis bagaimana mae di-atoernja?"

„Akoer mae pergi ka blakang boewat intip itoe doewa soedara mengomong apa," kata Tjhio Peng. „Kae toenggoe sadja di sini, sabentar akoe balik kasi kabar."

Tjhio Peng lantas pergi ka itoe roemah jang terkoeroeng tembok di sabelah Timoer, di mana itoe doewa soedara Heng ada tinggal. Di sabelah blakangnja itoe roemah ada memake satoe djendela besar, di sitoelah Tjhio Peng berdiri sembari pasang koeping. Ternjata itoe doewa orang lagi mengomong saling saoeetan.

„Baroesan koetika Tjhio taydjin menanja pada kae," ka-dengeran Heng Djoe Liong berkata, „mengapa kae poenja moeka berubah, akoe sanget koewatir kae toetoerken itoe perkara."

„Djika menoeroet akoe poenja pendapatet," kata jang moedahan, „ada lebih baek tjeritaken dengen teroes-terang."

„Kae gila! Kae tida pikir-pikir ia itoe ada kita poenja apa; kaloe sadja kita tjeritaken, lantas sadja kita aken di-borgol dan didjebloesken ka dalem pendjara, malah boleh djadi djoega kamoedian kita aken mendapet hoekoeman tabas batang leher."

„Ach, ia toch sama djoega mae binasakan kita berdoewa poenja djiwa," kata Heng Djoe Houw. „Sebab kaloe sadja ia kena tertangkap, pada waktoe Siangya preksa padanja dan meliat kita berdiri di soeatoe pinggir, soeda tentoe sadja ia djadi djengkel dan lantas rembet-rembet pada kita. Boekantah itoe waktoe aken terlebih tjilaka lagi?"

„Pada waktoe Siangya preksa padanja, apa kita tida bisa

menjingkir dan mengoempet? Biar bagaimana djoega akoe rasa lebih baek kita djangan tjeritaken."

Tjhio Peng mendengar sampe di sini merasa tida perloe mendengeri lebih djaoe, lantas ia balikin badannja dan balik kombali ka roemahnja Tian Him Hoei.

"Bagimana?" menanja toewan roemah.

Tjhio Peng lantas toetoerken apa jang ia soeda denger itoe doewa soedara bitjaraken.

"Besok dengan perlahan kita pantjing iaorang poenja omongan," kata Tian Tjiauw.

"Ako masa ada itoe kasabaran boewat menoenggoe sampe besok!" kamoedian Tjhio Peng lantas berseroeh memanggil boedjang.

Dalem sa'at itoe djoega ada satoe boedjangnja Tian Him Hoei jang manjaoet sembari menghamperi.

"Kaoe pergi oendang Heng Toa-loya dan Heng Dji-loya dateng ka sini," kata Hwan-kang-tji pada itoe boedjang.

Itoe boedjang lantas pergi melakoeken itoe prentah dan tida antara lama kamoedian, Heng Djoe Liong bersama soedara moedanja soeda dateng.

"Ako harep toewan berdoewa soeka berdoedoek," kata Tjhio Peng.

"Oleh kerna ada berdoewa taydjin di sini," kata jang toewahan, "kita tida brani berdoedoek."

"Ini djabatan negri tida berbeda sabagi djoega pertoen-djoekan wajang di atas panggoeng," kata Tjhio Peng, "siapa jang diseboet taydjin dan siapa jang diseboet siauwdjin, itoe lah tida lebih dari perhiasan sadja. Lagian kaoe berdoea djika kamoedian naek lagi bebrapa tingkatan, boekantah ada sama sadja dengan kita orang? Itoe waktue kita boekannya beroeroesan satjara officieel, hanja bikin pembitjarahan di antara soedara-soedara sendiri. Maka doedoeklah, djangan berlakoe soengkan, agar kita bisa bitjara dengan senang."

Itoe doewa soedara lantas menoeroet.

"Ako oendang kaoe berdoewa dateng ka sini," kita lagi Tjhio Peng, "perloenja maoe menjanjaken apa kaoe orang

mengarti atawa tida atoerannja orang melakoeken pakerdjahan negri? Dan kae orang poenja kawadjiban haroes mengoeroes pakerdjahan apa?"

„Lantaran kita berdoewa masi baroe, banjak hal jang tida begitoe mengarti," kata itoe doewa orang dengan berbareng. „Maka kita mengharep soepaja taydjin soeka membri adjaran."

„Kae orang, begitoe poen kita, poenja kawadjiban haroes menangkep pendjahat dan pentjoeri," kata Tjhio Peng. „Samentara itoe pentjoeri jang lakoeken pentjoerian di dalem kraton, boleh dibilang soeatoe perkara penting. Djika sampe temponja doewa boelan itoe pendjahat masi djoega belon bisa tertangkep, baginda keizer djadi goesar, nistjaja Siangya bisa bisa dipetjat dari djabatannja. Dengan begimana apa Siangya bisa kasi ampoen pada kita orang? Terang sekali jang kita semoea poen tida bisa tinggal senang dalem kita poenja kadoedoekan jang sekarang. Akoe koewatir kae berdoewa koerang mengarti, terpaksa akoe manerangken dengan melit. Maka kaloε sadja kae berdoewa ada mengetahoei apa-apa tentang itoe pentjoeri, terlebih baik kae orang lantas tjeritaken sekarang; sabaliknja djika kae orang bilang tida tae satoe apa, bila kamoedian ternjata kae orang soeda sengadja menoeoep resia, nistjaja kae orang poenja dosa aken djadi samingkin berat.

„Tida perdoeli siapa djoega adanja orang itoe, mae poen sobat baik, soedara dari satoe kandoengan, atawa poen ajah dan paman, soeatoe kadosahan tjoema haroes ditangoeng sadja oleh itoe orang jang melakoeken. Maka lebih baik ditjeritaken terlebih doeloe, agar diri kita bisa terloepoet dari bahaja. Akoe lantaran koewatir kae orang koerang mengarti dan sekarang lantaran takoet lantas menoeoep resia, nanti pada waktoe itoe pendjahat soeda tertangkep dan kae orang kena dirembet oleh itoe pendjahat, biar poen kita orang mae menoeoeng, djoega soeda kasep. Apa sekarang kae orang soeda mengarti?"

Heng Djoe Houw mengawasi pada soedara toewanja.

„Engko, apa kae soeda denger itoe omongan?" kata ia.

„Ja, tapi bagaimana baeknja?“ balik menanja itoe soedara jang toewahan.

„Akoë rasa lebih baek kita tjeritaken sadja teroes-terang,“ kata lagi jang moedahan. „Itoe waktöe kita haroes mendapat kasalahan apa djoega, bagaimana oentoeng sadja.“

„Sekarang ternjata akoë poenja doegahan ada benar sekali,“ menjelak Tjhio Peng. „Tjoema sadja kaoë berdoewa djangan selempang biar bagaimana sedikit sekali poen. Kaloe sadja kaoë berdoewa mendapat kadosahan apa-apa, akoë bersama Tian taydjín aken mendapat kabinasahan jang heibat. Apa itoe soempa tida tjoeköep berat dan kaoë orang masi belon brani bitjara teroes-terang?“

„Apabila kita tjeritaken ini hal,“ kata itoe doewa soedara dengan berbareng „kita poenja kadosahan sasoenggoenja boekan ketjil.“

„Akoë menanggoeng jang kaoë orang tida aken mendapat dosa satöe apa,“ menghiboer lagi Tjhio Peng.

„Sekarang akoë maöe tjeritaken teroes terang pada kadoewa taydjín,“ kata Heng Djoe Liöng. „Itöe orang she Jan bernama satöe hoeroef Hoei. Iapoenja gelaran diseboet Tiök-eng-djie dan diseboet djoega Pek Kiök Hoa.“

„Apa boekan poetranja Jan Tjoe Tok, itöe orang di Tintjioe?“ menjelak Tian Hoei Hoei.

„Betoel,“ djawab Heng Djoe Liöng.

„Kaoë boleh toetöerken dengan perlahan dan terang,“ kata Tjhio Peng.

„Itöe orang ada mendjadi kita poenja soeheng,“ kata lagi Heng Djoe Liöng jang melandjoetken bitjaranja. „Kita sama-sekali ada berampat dan ia jang paling besar dan akoë poenja Dji-soeheng bernama The Thian Hoey, jang tergelar Sintan-tjoe Oa-Thio-sian, orang berasal dari Siamsay, bersama kita berdoewa djadi ampat orang. Tjoema sadja biar poen kita perna soeheng sama Jan Hoei, tapi ampir tida berbeda sabagi moesoeh“

„Tida perloe kaoë bikin bersih diri begitöe roepa,“ menjelak Hwan-kang-tji; „sabagaimana tadi akoë soeda bilang, kaoë

orang boleh tida oesa koewatir karembet-rembet. Bitjara sadsja jang sabenarnja."

„Boekannja kita maoe membersihkan diri," kata Heng Djoe Houw; „tapi kaloe maoe bitjaraken ini hal, itoelah ada soeatoe riwayat pandjang sekali. Akoe poenja goeroe Go-hong-poo, she Kie bernama Kiang. Iapoenja gelaran diseboet Gin-sie-tiat-pwee-tjong-liong. Ia ada mempoenjai satoe prampoewan jang bernama Kie Say Hoa, djadi bersama akoe poenja Soebo, goeroekoe poenja anggota familie sama-sekali ada tiga orang. Paling pertama goeroekoe trima Jan Hoei mendjadi moeridnja dan soeda toeroenken iapoenja sa'antero ilmoe kapandean, sedikit poen tida ada jang katinggalan, oleh kerna itoe ia toendjang penghidoepannja akoe poenja goeroe saroemah tangga.

„Blakangan akoe poenja goeroe baroe menerima lagi kita bertiga mendjadi moeridnja, tapi Jan Hoei larang akoe poenja goeroe menoeroenken ilmoe kapandean pada kita orang, kerna koewatir djika kita soeda bisa pahamken ilmoe silat, aken mengalahken padanja. Akoe poenja goeroe koepingnja terlaloe enteng gampang sekali kena digosok, lagian iapoenja penghidoepan boleh dibilang bergantoeng pada Jan Hoei, maka ia tida brani kasi ilmoe perladjaran apa djoega pada kita bertiga. Kaloe sadsja akoe poenja goeroe matanja masi awas, boleh djadi ia tida terlaloe mengandel penghidoepan pada Jan Hoei; tapi soenggoe tida beroentoeng iapoenja kadoewa mata soeda boeta.

„Goeroekoe ada mempoenjai satoe soedara moeda jang bernama Kie Tjay, orang dari Yangtjioe dan tergelar Hoa-to. Tahon pertama koetika ia dateng mengoendjoengin roemahnja akoe poenja goeroe boewat hatoerken slamet goeroekoe poenja hari-taon, roepanja ia memperhatikan pada kita bertiga dan menanjaken kita orang soeda bisa ilmoe kapandean apa. Kita orang kasi taoe bahoewa kita tida dapet peladjaran ilmoe kapandean apa djoega, kerna belon lama dateng bergoeroe. Soesiok lantasi pesen soepaja kita orang berladjar dengan radjin. Tahon kadoewa kombali Soesiok dateng mem-

bri slamet hari-lahirnja akoe poenja goeroe dan itoe waktoe poen, kombali ia menanjaken pada kita orang; tapi kita masi belon dapet peladjarken soeatoe apa. Blakangan lantaran pengaroehnja aer kata-kata, akoe poenja Soesiok djadi riboet sama goeroekoe, kamoedian ia lantas adjak kita bertiga ka roemahnja di Yangtjioe.

„Kita bertiga poenja ilmoe kapandean, semoea ditoeroenken oleh Soesiok. Ia adjari akoe poenja Dji-soeheng samatjem sendjata resia jang berlaenan sama Pek Kiok Hoa, ja itoe samatjem peloeroe jang dilepaskan oleh satoe gondewa; tjoema sajang kita berdoewa terlaloe bodo, koetika Soesiok adjari kita menggoenaken samatjem sendjata resia jang dinamaken Pat-po-tian-kong-toei, tida djoega kita bisa goenaken, biar poen soeda diadjari beroelang-oelang. Inilah djoega sebabnja tadi kita soeda bilang bahoewa biar poen namanja Soeheng dan soetee, tapi tida berbeda sebagai djoega moesoeh. Itoe semoea ada itoe riwayat jang telah laloe, kita berdoea bakal mendapet kadosahan apa, terserah padah taydjijn poenja timbangan jang adil.“

„Kaoe orang djangan seboet prihal kadosahan,“ kata Tjhio Peng. „Biar poen perhoeboengan familie antara bapa dan anak, siapa jang lakoeken itoe perboewatan, itoe oranglah jang haroes menanggoeng kadosahannja; apapoela kaoe orang tjoema perhoeboengan soedara dari satoe goeroe, soeda tentoe sadja sama-sekali tida ada sangkoetannja sama kaoe berdoewa. Tapi itoe Pek Kiok Hoa sabetoelnja ada mempoenjai ilmoe kapandean apa?“

„Apabila maoe dibitjaraken ilmoe kapandean,“ kata Heng Djoe Liong, „boleh dibilang djarang ada bandingannja. Pertama ia ada mempoenjai satoe pedang wasiat, jang diseboet Tji-tian-kiam, bisa mengiris emas dan memotong batoe giok dan tida perdoeli sendjata apa sadja, satoe kali beradoe sama itoe pedang wasiat lantas sadja djadi terpoetoes doewa; kadoewa iapoenja tangan doewa-doewanja pande sekali malepaskan sendjata resia „pio“ dengen sanget djitoe; katiga ia ada mempoenjai kapandean di dalem aer dengen bisa me-

lekin matanja boewat meliat apa-apa."

"Sekarang ia tinggal di mana?" menanja Tjhio Peng.

"Di soeatoe tempat dalem bilangan afdeeling Tjitjioe, jang dinamaken Louw-an-san, Pa-pi-kok, sedeng di blakang itoe boekit (Pi-pa-san) ada satoe telaga jang diseboet Piauw-jan-ouw."

"Kaloed soeda dikatahoei di mana iapoenja sarang, perkara menangkep padanja boekan perkara soeker."

"Masi ada lagi soeatoe hal," manerangken lagi Heng Djoe Liong, "djika maoe menangkep padanja di Louw-an-san, Pi-pa-kok, tida nanti bisa berhasil djika mentjari pada saorang jang bernama Jan Hoei.

"Apa ia soeda memake nama laen?"

"Sadari bermoela ia dateng ka itoe tempat, ia tida memake namanja jang sedjati dan memake shenja iapoenja nene loewar."

"She apatah itoe?" manegasken Tjhio Peng.

"She Oet-tie dan nama jang ia pake satoe hoeroef Liang. Tegasnja Pek Kiok Hoa di tempat kadiamannja terkenal dengen itoe nama palsoe Oet-tie Liang. Di Pi-pa-kok ia mendirikan satoe goendoekan roemah-roemah dengen pekarangan jang loewas, semoewa boedjang-boedjang ia jang panggil sendiri. Pendoedoek di sitoe lantaran tida taoe iapoenja asaloesoel jang sasoenggoenja, semoewa bahasaken ia Oet-tie Tay-khoa-djin. Sebab iaorang mendapat katerangan bahoewa itoe Oet-tie Tay-khoa-djin ada toeroenan orang berpangkat. Djika ia pergi kaloewar „beroesaha" dan poelang dengen menggondol banjak harta dan barang berharga, ia bilang di banjak tempat ia ada mempoenjai peroesahan besar, itoe waktoe ia baroe habis pergi bikin peritoengan dan orang banjak jang tida taoe satoe apa lantas sadja pertjaja iapoenja obrolan itoe. Lagian dalem perkara oewang iapoenja tangan sanget terlepas dan orang-orang kampoengan jang miskin, soeda tentoe sadja djadi merasa sanget soeka padanja, sedeng iapoenja orang-orang tida ada satoe jang tida mengindahken padanja. Maka kaloed maoe menangkep pada-

nja, perloe sekali moesti hati-hati, djangan sampe ia menjioem baec dan lantac maboer."

"Akoec soeda pikir soeatoc daja-oepaja jang baek, asal sadjakaoec berdoewa tida memboeka resia, kaoec orang bakal mendapet gandjaran jang teroetama. Sekarang mari mengikoet padakoec boewat mengadep pada Siang-ya."

Itoec doewa soedara lantac manggoetken kapala. Begitoelaha iaorang berikoet djoega Tian Tjiauw sama-sama masoek ka dalem boewat mengadep pada Pauw Kong. Tatkala iaorang sampe di moekanja itoec kamar batja, lebih doeloc minta Pauw Hin masoek kasi taoec dan itoec ambtenaar lantac oendang marika itoec masoek ka dalem. Pada sasocdanja djalanken kahormatan sabagimana biasa, Tjhio Peng lantac toetkerken dengen terang apa jang itoec doewa soedara Heng soeda bitjaraken, sedeng itoec doewa orang lantac madjoc menghamperi boewat menerima salah; tapi Pauw Kong lantac gerakin tangannya.

"Kaoec berdoewa sama-sakali tida berdosa satoc apa," kata ia. "Sekarang kaoec orang soeda petjahken itoec resia hingga bisa dikatahoeci di mana sarangnja itoec pendjahat, poenkok sabalijnja maoc tjatet kaoec berdoewa poenja gandjaran."

Kamoedian itoec ambtenaar kasi prentah Tian Tjiauw dan Tjhio Peng pergi ka Louw-an-san menangkep itoec pendjahat, sedeng orang-orang jang maoc dibawa boleh menoeroet sasockanja sendiri boewat mamilih

"Orang-orang jang aken dibawa adalah kadoewa Heng Hauw-wie, Pang Hauw-wie dan bebrapa poeloc oppas-oppas politie dari ini kantor," kata Tjhio Peng. "Salaennja itoec aken memoehoen Siangya soeka kasiken satoc soerat dienst boewat pembesar di itoec tempat, kamoedian sasampenja di sana kita aken berboewat dengen meliat gelagat."

"Kadoewa Hou-wie boleh menoenggoec doeloc di loewar dan sekalian mamilih itoec oppas-oppas jang bakal dibawa," kata Pauw Kong.

Itoec ampac orang lantac pergi ka loewar dan memanggil itoec doewa kapala oppas, Han Tjiaat dan Touw Soen, soeroec

iaorang mamilih doewabelas oppas jang beroemoer moeda dan bertoeboe koewat, kamoedian ia menanja: „Apa itoe kapala-kapala oppas dari semoewa district bawahannja Khay-hong-hoe soeda datang?“

„Pada sasoedanja taydjin kasi prentah boewat memanggil iaorang, itoe kapala-kapala oppas dari semoewa district telah datang ka sini boewat menoenngoe prentah, kamoedian iaorang soeroe orang-orang sabawahannja poelang mengasi kabar pada kawan sadjabatnja jang berdeketan sama masing-masing poenja bilangan.“

„Baek,“ kata Tjhio Peng, jang bersama tiga kawannja balik kombali ka Hauw-wie-see atawa tempat berkoempoelnja semoewa ponggawa dari Khay-hong-hoe. Mendadak kerepintoe terboeka dan bertindak masoek doewa orang. Tjhio Peng liat marika itoe boekan laen dari Thio Liong dan Tio Houw.

„Kaoe berdoewa datang ka sini ada oeroesan apa?“

Ini hal baek diterangkan lebih doeloe. Tio Houw taoe baehowa Tjhio Peng menerima prentahnja Pauw Kong pergi ka Louw-an-san boewat menangkap Jan Hoei alias Pek Kiok Hoa, maka ia lantas berkata pada Thio Samko, apa kaoe liat kaādahan sekarang soeda berobah? Sebab sekarang orang dapet pangkat dengen tjara jang gampang sekali. Doeloean Louw Hong, Tji Kheng dan Tjhio Peng, iaorang moesti pandjat tiang bendera, porot lobang-lobang boekit dan menangkap kodok di dalem empang; tapi sekarang enak sekali, orang jang datang boewat melakoeken pemboenoehan djoega bisa mendapet djabatan negri. Kaoe dan akoe mamegang itoe kawadjiban mandjaga „Gie-heng“ soeda sakean lamannya, tapi kita poenja pangkat masi tetap Hauw-wie djoega. Belon lama kita melakoeken soeatoe pakerdjahan jang tida membawa hasil satoe apa, jaitoe menganterin Pek Ngother-thay, sabalijnja orang-orang baroe sekarang mendapet pakerdjahan baek. Ini satoe kali iaorang pergi, ampir bisa dipastiken Pek Kiok Hoa aken dapet tertangkap, dengen begitoe, orang-orang jang toeroet pergi, tentoe sekali bakal men-

dapet gandjaran dan ada pengharepan boeat naek pangkat."

"Itoelah djangan diboewat ngiri," kata Thio Liong, "sebab laen orang ada mempoenjai ilmoe kapandean jang lebih tinggi dari kita."

"Kita poenja kapandean djoega tida bisa dikata djelek," kata lagi Tio Houw. "Maka lebih baik kita mengadep pada Siangya boewat maminta pakerdjahan. Biarlah iaorang soeka mengala sedikit dan djangan maminta terlaloe banjak dari kita, dengan begitoe kita bisa toeroet mendapat gandjaran dari marika poenja tenaga. Memang djoega kaloe maoe di-bitjaraken perkara menankep Pek Kiok Hoa, soeda tentoe sadja kaoe dan akoe tida ada itoe kamampoean; tapi biar bagaimana djoega, itoe pendjahat tentoe bakal tertangkep, kaloe kita toeroet dalem itoe pakerdjahan, pada waktoe Siangya masoekin laporan pada baginda keizer, tida bisa tida kita berdoewa poenja nama aken toeroet diseboet. Kaloe begitoe, boekantah kita poen teritoeng berdjasa djoega?"

Thio Liong terpaksa moesti menoeroeti pikirannja iapoenja soedara angkat, jang dengan tida banjak bitjara lagi lantas seret sadja jang terseboet doeloan pergi mengadep pada Pauw Kong di dalem kamar boekoenja. Pada sasoea iaorang djalanken kahormatan sabagimana biasanja, Tio Houw lantas menjataken kainginannja. Pauw Kong taoe bahoewa ini doewa orang tida ada mempoenjai kamampoean apa-apa, tapi ia mengarti djoega Tio Houw poenja maksoed jang ingin mendapat kanaekan dalem kadoedoekannja. Oleh kerna mamikir ada Tian Him Hoei dan Tjhio Tiang Tek, jang soeda tentoe sadja tida nanti membikin ini doewa orang mendapat soesa, lantas sadja ia meloeloesken itoe permintahan. Itoe doewa orang lantas moendoer. Pauw Kong soeroe Kong-soen Tjek menoelis satoe soerat dienst dan kamoedian ditrimaken pada Tjhio Peng.

Itoe waktoe koetika Tjhio Peng meliat Thio Liong dan Tio Houw masoek, masi belon bisa tebak apa marika poenja maksoed, maka lantas bikin itoe pertanjanhan.

„Baroesan Siangya telah panggil kita berdoewa mengadep

di iapoenja kamar-boekoe," kata Tio Houw dengan mendjoesta, „dan Siangya bilang lantaran orang-orang jang maoe pergi menangkup Pek Kiok Hoa, djoemblanja terlaloe sedikit, maka prentahken djoega kita berdoewa boewat toeroet membantoe dan menoenggoe kae berdoewa poenja prentah.“

Hei, Lauw-Tio, kae ini omongan soenggoe-soenggoe?“ menanja Tjhio Peng jang sama-sekali tida maoe pertjaja itoe obrolan.

„Siapatah jang maoe membohong dalam perkara begini!“ kata Tio Houw.

„Kita poenja orang-orang soeda sampe tjoekeop,“ kata Tjhio Peng; „tapi kaloe benar Siangya ada kasi itoe prentah, akoe maoe pergi masoek boewat tanjakan.“

Sahabisnja berkata Tjhio Peng berbangkit dari tempat doedoeknja dan oendjoek sikep sabagi orang jang maoe pergi ka loewar. Hal mana soeda membikin kaget pada Tio Houw, jang dengan goegoep lantas menjekal lengannja Tjhio Peng.

„Tjhio-ya, sabetoelnja boekannja begitoe,“ kata ia, „dan akoe sendirilah jang telah pergi minta ini pakerdjahan pada Siangya.“

„Boekantah kae bitjara dengan teroes-terang ada lebih baik? Akoe poenja tabeat paling tida soeka sama orang jang mendjoesta.“

Beroentoeng Tio Houw poenja koelit moeka ada sampe tebal, kaloe sadja ini hal terdjadi pada laen orang, sedikitnja tentoe paras moeka berobah djadi merah. Tatkala itoe doewa orang lagi bitjara, Tian Him Hoei di satoe pinggirang tinggal mengawasi dengan bersenjoem ewa. Mendadak kere pintoe terboeka lagi dan sekarang Kong-soen Tjek jang masoek dengan membawa satoe soerat dienst sembari oendjoek moeka tertawa. Semoewa orang pada berbangkit dan oendang ia berdoedoek.

„Tjhio-ya, ini soerat dienst boleh dibawa pada Tihoe dari Tjitjioe.“ kata Kong-soen Tjek. „Itoe ambtenaar bernama Tji Koan dan moeridnja kita poenja Siangya. Segala perkara boleh minta iapoenja bantoean.“

Tjhio Peng trima itoe soerat dienst dan ditrimaken lagi pada Tian Him Hoei, di laen fihak ia kasi prentah soepaja orang bikin sedia koeda-koeda toenggang jang perloe, ka-moedian masing-masing lantas bawa sasoeatoe orang poenja barang bekelan dengan di'iketken di blakang sela koeda. Tjhio Peng soeroe itoe doewabelas kapala oppas pergi ma-nerima masing-masing poenja ongkos djalan dan minta dise-diaken koeda toenggang pada kapala-district dari Siang-hoe-koan. Ong Tiauw dan Ma Han poen toeroet kaloewar me-ganter sampe di pintoe depan.

„Akoeharep sadja toewan-toewan sekalian poenja paker-djahan bisa lekas berhasil,“ kata itoe doewa orang ; kita di sini menoennggoe kabar baik.“

„Mengandel sama kae berdoewa poenja redjeki, harep sadja bisa berhasil,“ kata bebrapa orang.

FATSAL XX.

Tatkala itoe rombongan orang dari Khay-hong-hoe sampe di pintoe-kota Tjeng-hong-boen boewat mengasi liat soerat katerangan pada pendjaga pintoe kota, mendadak itoe doewabelas kapala oppas dengan berkoeda dateng menjoesoel. Begitoelah iaorang lantas brangkat sama-sama. Tida ditjeritaken dalem iaorang poenja perdjalanan. Pada soeatoe hari iaorang soeda sampe di pintoe kota Timoer dari itoe afdeeling Tjijtjioe. Tjhio Peng soeroe pengikoetnja pergi mentjari soeatoe roemah makan jang baek dan bresih dan achirnja iaorang menginep di satoe roemah makan jang memake merk Hok Hin, sedeng Tjhio Peng bersama Tian Him Hoei dengan membawa satoe pengikoet pergi katemoeken Tihoe di ia-poenja kantor.

Itoe pembesar afdeeling soeroe orangnja memboeka pintoe tengah dan ia sendiri kaloewar menjamboet kadatengannya itoe doewa ponggawa dari Khay-hong-hoe. Tian Tjiauw dan Tjhio Peng lebih siang soeda mengeboet masing-masing poenja pakean jang penoeh deboe. Tatkala soeda dateng deket, iaorang liat itoe Tihoe memake iapoenja pakean kabesaran, jang memake leher boender dari soetra merah. Iapoenja koelit moeka poetih dan tjakep ditimpalin sama tiga baris koemis pandjang. Koetika meliat pada itoe doewa orang, lantas sadja ia membri hormat sampe kadoewa tangannya ampir mengenaken boemi. Tian Tjiauw dan Tjhio Peng membales sabagimana pantesnja. Itoe Tihoe oendang tetamoenja masoek ka satoe kamar-boekoe, di mana iaorang berdoedoek dan disoegoehi thee.

„Oleh kerna akoe tida mendapet taoe lebih siang atas kadoewa toewan poenja kadatangan,” kata itoe ambtenaar, „djadi akoe tida bisa menjamboet dari djaoe. Harep sadja kadoewa toewan soeka membri ma'af.“

„Oh, itoelah kita tida sanggoep trima,” djawab itoe doewa orang.

„Lo-Soe Siangya, di kota radja apa selamanja ini ada baek ?”

„Baek, tida koerang satoe apa.”

„Toewan berdoewa poenja kadatengan ka sini maoc kasi prentahan apa?” menanja lagi Tji Koan, itoe Tihoc.

„Akoe harep soepaja taydjn singkirken doeloe orang-orang jang berada di sini,” kata Tjhio Peng.

Tji Koan lantas kasi prentah semoewa orang-orangnja menjingkir kaloewar.

„Toewan-toewan tentoe ada perkara resia jang penting,” kata itoe ambtenaar, „dan sekarang soeda tida ada laen orang, akoe rasa boleh lantas toetoerken hal itoe padakoe.”

„Louw-an-san apa tempat jang berada di bawah taydjn poenja pegangan?” moelai Tjhio Peng.

Tji Koan lantas manggoetken kapala dan berkata: „Ja.”

„Di sini ada satoe soerat dienst dan harep taydjn soeka preksa,” kata Tjhio Peng sembari minta Tian Him Hoei kasi ken soerat itoe. Tian Tjiauw lantas kaloearken itoe soerat dienst dan trimaken pada itoe ambtenaar, jang lantas boeka sarta batja boenjinja. Pada waktoe ia soeda membatja sampe di achinja, iapoenja boeloe perhiasan topi kabesarannja djadi menggetar-getar. Kamoedian ia poelangken lagi itoe soerat dienst pada Tian Him Hoei.

„Pendjahat jang saroepa ini,” kata ia, „roepanja tida terlae gampang ditangkepnja. Akoe minta tanja kadoewa taydjn apa maoc memake tenaga pasoeakan balatentara atawa memake bantoeannja orang-orang politie, pada waktoe melakoeken itoe penangkepan?”

„Apabila menggeraken pasoeakan balatentara,” kata Tjhio Peng, „akoe koewatir tida bisa dipegang resia dan satoe kali ada tersiar kabar angin, nistjaja itoe pendjahat boeroe-boeroe menjingkirken diri ka laen tempat. Itoelah tida baek. Sabaliknja djika memake tenaga bantoeannja orang-orang politie, djoega tida ada banjak goenanja. Sebab iaorang poenja kapandean tida sabrapa, taro kata bertemoe sama itoe pendjahat, toch iaorang tida ada kemampuan boewat menangkep. Maka ini djalan djoega tida bisa dipake.”

„Kaloe begitoe akoe minta taydjn sadja oendjoek bagimana

baeknja," kata itoe ambtenaar.

„Itoelah kita nanti bitjaraken dengen perlahan," kata Tjhio Peng. „Akoë ingin menanja apa taydjin soeda perna pergi ka Pi-pa-kok di Louw-an-an?"

„Louw-an-san akoe soeda taoë pergi; tjoema sarangnja itoe pendjahat akoe belon taoë datengin."

„Apa di sini ada saorang jang taoë selak-seloeknja djalan di Louw-an-san atawa tida tida?"

Itoë Tihoe lantas manggoetken kapala.

„Dalem akoe poenja kantoer ada soeatoe penggawe jang mendjadi kapala toekang preksa padjek bernama Yauw Tjeng," kata ia. „Ia itoe sering sekali melakoeken pakerdjahnja ka itoe goenoeng dan taoë terang selak-seloeknja djalan di itoe tempat."

„Kaloe begitoe, akoe harep taydjin soeka panggil itoe orang dateng ka sini," kata Hwan-kang-tji.

Tji Koan lantas berseroeh dengen keras: „Hei, kae orang pergi panggil Yauw Tjeng dateng ka sini, taydjin ada omongan jang hendak ditanjakan."

Tida antara lama kamoedian pintoe lantas terboeka dan berdjalan masoek satoe orang toewa jang soeda berkoemis poetih dan bermoecka merah, sedeng dandanannja sabagimana biasanja orang gagah di itoe djaman; tapi biar poen oemoernja soeda toewa, toch sikepnja masi tinggal gagah dan gesit. Lebih doeloe ia membri hormat pada Tji Koan, kamoedian pada Tian Tjiau dan Tjhio Peng, koetika chefnja adjar ia kenal pada itoe doewa orang.

„Apa kae kenal baek selak-seloeknja djalan di Louw-an-san?" menanja Tjhio Peng.

„Ja, akoe taoë baek ka'adahannja itoe tempat," djawab Yauw Tjeng.

„Itoë goenoeng terpisa brapa djaoenja dari kota, sama-sekali ada brapa djalan boewat masoek, di dalem itoe goenoeng ada brapa loewasnja dan di sabelah blakangnja itoe boekit ada mempoenjai bebrapa djalan boewat kaloe war? Tjobalah kae tjeritaken satoe per satoe dengen terang."

„Pada sasoe danja kaloewar pintoe kota ini jang sabelah Barat, terpisa lima li djaoenja ada soeatoe tempat rame jang dinamaken Dji-tjan-tin, kaloewar dari itoe kampoeng jang rame poenja bagian sabelah Barat, lantah berhadep-hadepan sama Louw-an-san poenja moeloet boewat djalan masoek jang sabelah Timoer. Dari sini ada soeatoe djalanan jang meneroes ka Pi-pa-kok. Di sabelah Oetara ada ampat boekit ketjil, begitoe poen di sabelah Selatan; kaloe orang ambil djalan dari itoe goenoeng-goenoeng ketjil, toch achirnja moesti kaloewar djoega dari moeloetnja itoe goenoeng jang di sabelah Timoer. Inilah djoega sebabnja maka dinamaken Pi-pa-kok, jang meroepaken sabagi satoe kaladjengking. Itoe delapan boekit ketjil bisa dioepamaken sabagi kakinja itoe kaladjengking, sedeng moeloetnja itoe goenoeng bisa dioepamaken boentoetnja. Di sabelah blakang tida ada djalanan, katjoewali satoe telaga jang dinamaken Piau-w-jan-ouw.“

„Itoe orang jang bernama Oet-tie Liang tinggal di mana?“ menanja Tjhio Peng.

„Ia mendirikan soeatoe goendoekan roemah, jang berdekatan sama itoe Pi-pa-kok jang sabelah Barat, sedeng ia-poenja pekarangan roemah jang sabelah blakang tida berdjaeohan sama itoe Piau-w-jan-ouw.“

„Itoe Oet-tie Liang ada orang bangsa apa?“ menanja Tjhio Peng.

„Menoeroet apa jang akoe taoe, katanja ia ada toeroenan orang berpangkat, maka semoewa orang bahasaken ianja Tay-khoa-djin, kaloe boekannja toeroenan orang berpangkat tentoe tida bisa memake itoe gelaran. Ia ada mempoenjai banjak harta dan boleh dibilang paling hartawan dalem ini bilangan.“

„Apa kae taoe pasti bahoewa ia itoe ada anaknja orang berpangkat?“

„Tida, sebab ia ada pendoeboek jang baroe pindah ka sitoe. Apabila ia terlahir dan besar di sini, tentoe akoe bisa taoe dengen pasti iapoenja asal-oesoel bagimana.“

„Apa kae taoe ia berasal orang dari mana?“

„Itoelah akoe tida taoe dengan terang. Ada orang bilang dari Lamyang-hoe, ada djoega jang bilang dari Tintjioe, tapi tida taoe jang mana lebih betoel.”

„Itoe tida mengapa,” kata Tjhio Peng. „Tapi sasoenggoenja akoe maoe kasi taoe pada kae, itoe orang ada pendjahat jang telah tjoeri baginda keizer poenja pakean karadja-han. Sekarang atas prentahnja Siangya kita dateng ka sini boeat menangkep padanja. Akoe harep sadja kae moesti pegang keras ini resia, kerna sanget dikoewatir itoe pendjahat mendapat kabar dan lantas maboer. Sekarang akoe maoe minta kae poenja bantoean, boeat pergi tjari taoe, apa itoe pendjahat ada di roemah atawa tida; tapi moesti hati-hati sekali, djangan sampe ia bisa menjioem baoe dan teroes merat.”

„Apa ini waktoe ia ada di roemah atawa tida, itoelah akoe tida taoe pasti; sekarang akoe maoe pergi tjari taoe, kamoedian akoe balik kasi kabar pada taydjin.”

„Kaloe begitoe, baeklah; tapi kae moesti pergi doeloe ka itoe roemah makan merk Hok Hin di pintoe kota Timoer, di mana kae mentjari pada Thio Liong, Tio Houw, Pang Jan, Heng Djoe Liong dan Heng Djoe Houw, itoe bebrapa loya, pada siapa kae soeroe iaorang dengan diam-diam brangkat ka Dji-tjan-tin dan mentjari satoe tempat boewat mondok; tapi djangan sekali kasi taoe apa-apa pada orang-orang di itoe roemah makan. Kae pikir roemah makan apa jang baek, soepaja kamoedian dengan gampang akoe bersama kae poenja taydjin menjoesoel ka sana?”

Yauw Tjeng berpikir sabentaran, kamoedian ia lantas berkata: „Di sana ada satoe Sam-gie-tiam, jang poenja tempat loewas dan rawatannja baek; sedeng eigenaarnja poen ada orang jang bakerdja dalem kita poenja kantoer sabagi oppas. Maka akoe rasa ini hotel ada sampe baek.”

„Baeklah dan kae boleh lantas brangkat,” kata Tjhio Peng.

Tji Koan maoe soeroe orangnja sediaken satoe medja santapan dan minoeman sabagi kahormatannja Tjhio Peng dan

Tian Tjiauw; tapi Hwan-kang-tji lantas gerakin tangannya menjega.

„Itoe sama-sekali tida perloe dan akoe hatoerken banjak trima kasi lebih doeloe taydjin poenja boedi kabaekan itoe,” kata ia. „Di sini apa ada ambtenaar militair jang pande?”

„Kita di sini ada mempoenjai soeatoe Tjongpeng,” djawab Tji Koan, „dan akoe denger kabar ini Tjongpeng taydjin ada kaloewaran soldadoe biasa, lantaran kapandeaanja ia soeda bisa naek ka tingkatan jang begitoe tinggi. Iapoenja ilmoe kapandean tida perdoeli di atas koeda atawa di bawah, semoewanja ada sanget bagoes. Lagian djika perloe memake pasoeakan balatentara negri, moesti mengandel sama bantoeanja ini orang baroelah bisa beres.”

„Siapa namanja itoe Tjongpeng taydjin?” menanja Hwan-kang-tji.

„Pang Tjin Kang dan tergelar Tan-pian-Tjiang,” kata itoe Tihoe.

„Kaloe begitoe, akoe harep taydjin soeka pergi mengoendang itoe ambtenaar militair dateng ka sini.”

Tji Koan lantas panggil lagi orangnja jang menoenggoe di loewar dan soeroe ia membawa satoe kaartjis nama boewat pergi mengoendang pada Pang Tjin Kang Tjongpeng dateng ka sini boewat berdamiken soeatoe oeroesan jang sanget penting. Itoe orang lantas berlaloe boewat melakoeken itoe prentah. Tji Koan menjanjaken bebrapa perkara jang terdjadi di kota radja pada Tjhio Peng, kamoedian ia bitjaraken djoega perkara di Siang-yang-hoe. Ia menjataken menjes- sel atas meninggalnja Kim-mo-tji, Pek Giok Tong almarhoem. Sebab doeloe koetida Tji Koan mendjabat pangkat Tikoan di district Siang-hoe, ialah jang mengoeroes perkaranja Gan Sin Bin dan Hwan Tjong Gie dan lantaran ia berdjasa dalem mengoeroes ini doewa perkara, Pauw Kong lantas poedjiken boewat ia mendjabat pangkat Tihoe di Tjitjioe. Pada waktoe iaorang lagi bitjara, soeatoe, penggawe kasi taoe bahoewa Pang Tjongpeng taydjin soeda dateng dan bakal dikatemoeken di mana.

„Oendang sadja ia dateng masoek ka sini,” kata Tji Koan. Tida antara lama, di sabelah loewar ada kadengeran orang mendehem dan bertindak masoek itoe Tjongpeng, jang da-lem hatinja merasa sedikit mendongkol Tihoe tida menjamboet iapoenja kadatengan; tapi ia tida taoe bahoewa itoe Tihoe lagi menemenin Tian Him Hoei dan Tjhio Peng, jang soeda tentoe sadja tida bisa pergi menjamboet padanja. Sabagitoe lekas itoe Tjongpeng masoek, Tji Koan lantas mengangkat kadoewa tangan membri hormat sampe kadoewa tangannja ampir mengenaken djoebin.

„Akoek tida bisa menjamboet toewan dari kadjaeohan,” kata ia, „harep sadja koe soeka membri ma'af. Sekarang akoe maoe adjar kenal pada ini doewa taydjin jang dateng dari kota radja. Ini ada Tian Him Hoei taydjin dan ini ada Tjhio Tiang Tek taydjin; dan inilah Pang Tjin Kang taydjin, Tjongpeng di ini kota.”

Itoe tiga orang lantas membri hormat satoe sama laen. Tian Him Hoei pandang itoe Tjongpeng toeboenja tinggi besar dan moekanja seperti pantat koewali. Romannja garang dan badannja pasek. Sedeng itoe Tjongpeng meliat Tian Him Hoei jang romannja tjakep dan gagah, sanget bertentangan sama roepanja Tjhio Peng jang seperti saorang sakit.

„Akoek tida mengatahoei kadoewa taydjin dateng ka ini tempat, hingga akoe tida bisa dateng menjamboet, harep sadja soeka ma'afken akoe poenja kadosahan itoe,” kata Pang Tjin Kang. „Djika kadoewa taydjin tida menampik, akoe maoe mengoendang kadoewa taydjin bersantap dan minoem sedikit arak di akoe poenja kantoer.”

„Nanti doeloe,” kata Tjhio Peng, „perkara makan minoem ada gampang; tapi kita poenja kadatengan ka sini ada membawa prentahnja Pauw Siangya boewat mengoeroes soeatoe pakerdjahan jang sanget penting.”

„Pakerdjahan penting apa taydjin, apa akoe toeroet mendapat taoe?”

„Inilah djoega sebabnja maka kita telah mengoendang taydjin dateng ka sini,” kata Tjhio Peng. „Itoe Louw-an-san

ada mendjadi tempat jang di bawa pegangannya taydjin dan di sitoe ada berdiam satoe pendjahat. Lantaran kita maoe menangkep pada pendjahat itoe, maka sekarang kita maoe berempoeok sama taydjin."

"Itoe pendjahat telah melakoeken kadjahatan apa?" menanja Pang Tjin Kang.

"Kita ada membawa satoe soerat dienst, harep kae soeka preksa," sahabisnja berkata ia minta Tian Him Hoei kasiken soerat itoe.

"Kadoewa taydjin perloe memake brapa banjak soldadoe boewat menangkep itoe pendjahat?" menanja itoe Tjongpeng pada sasoedanja ia membatja itoe soerat. "Dengen lekas akoe maoe bikin persediaan."

"Lebih doeloe taydjin moesti siapken doewa ratoes pasoe-kan kaki," kata Tjhio Peng, "tapi semoewanja moesti dengan pakean menjamar dengan membekal sendjata. Itoe pasoe-kan moesti datang mengoempat di tempat jang berdeketan sama itoe roemah makan Sam-gie-tiam di Dji-tjan-tin, kamoedian moesti mengikoet mengepoeng pada itoe pendjahat dengan bikin pendjagahan di sasoeatoe djalanan kaloewarnja itoe goenoeng. Kita orang aken masoek ka dalem dan menangkep itoe pendjahat, kaloe itoe pendjahat lari kaloewar dan taydjin poenja pasoe-kan tida bisa dapet taegkep padanja itoe kasalahan taydjin jang moesti tanggoeng."

Pang Tjongpeng beroelang-oelang manggoetken kapala dan bilang: "Baek."

"Sekarang akoe harep taydjin boleh bikin itoe persiapan," kata lagi Tjhio Peng "dan menoenngoe di itoe roemah makan Sam-gie-tiam."

Pang Tjin Kang taoe bahoewa ini oeroesan sanget besar, maka ia lantas berpamitan boewat bikin persediaan apa jang parloe. Tjhio Peng bersama Tji Koan dan iapoenja oppas-oppas dengan berkoeda dan bersendjata lengkap menoe-djoe ka Dji-tjan-tin. Tatkala sampe di depannja itoe roemah makan Sam-gie-tiam, eigenaar itoe roemah makan datang memboeroe dan membahasaken taydjin serta maoe dja-

lanken kahormatan besar, tapi Tjhio Peng menjaga sembari kedipin matanja. Itoe eigenaar lantas mengarti dan oeroengken itoe niatan dan sama-sama masoek ka dalem itoe roemah makan, di mana itoe eigenaar mendjalanken kahormatan pada itoe tiga orang sabagimana biasanja.

„Apa kita poenja oeroesan ini kaeo soeda taoe?“ menanja Tjhio Peng.

„Akoel telah denger kabar dari Yauw Tjeng, tapi ia minta akoel pegang resia,“ manerangkan itoe eigenaar roemah makan.

„Ja, itoe memang betoel. Malah kaeo moesti pesen wanti-wanti pada kaeo poenja penggawe-penggawe tida boleh bikin riboet di loewaran. Sebab satoe kali ini resia tersiar, nistjaja itoe pendjahat bisa melolosken diri dan kaeo aken menda-pet hoekoeman jang boekan enteng.“

Soeda tentoe sadja itoe eigenaar menjanggoepin boewat mamegang resia. Itoe waktue Thio Liong, Tio Houw, Pang Jan dan kadoewa soedara Heng kaloewar menjamboet. Tjhio Peng lantas adjar kenal lima Hanw-wie pada Tji Tihoe, pada sasoedanja mendjalanken kahormatan satoe dengan laen, marika berdoedoek di soeatoe roewangan besar sembari minoem thee. Sedeng djongos itoe hotel dengan repot menjediaken aer boewat tjoetji moeka. Tio Houw tjeritaken bahoewa ia-poenja kadatengan ka sini ada atas pengoendjoekannja Yauw Tjeng.

„Sekarang Yauw Tjeng pergi ka mana?“ menanja Tjhio Peng.

„Ja pergi mentjari katerangan tentang Pek Kiok Hoa.“ djawab Tio Houw.

Pada sasoedanja orang pada habis dahar dan lagi pada minoem thee, mendadak ada dateng masoek saorang, jang di atas poendaknja memangoel satoe orang. Hal mana soeda membikin semoewa orang djadi heran. Ternjata orang itoe boekan laen dari Yauw Tjeng, jang itoe waktue lantas lepaskan barang panggoelannja ka atas djoebin, kamoedian ia tekoek sabelah loetoetnja di hadapan Tjhio Peng.

„Akoë menghatoerken akoë poenja hasil pakerdjahan, tay-djin," kata ia.

„Ternjata kaeo ini biar poen soeda toewa tapi masi tinggal gagah," memoedji Tjhio Peng. „Dan ini orang siapa?"

Koetika Yauw Tjeng soeda pernahken Thio Liong dan kawan-kawannja di itoe roemah makan Sam-gie-tiam, lantas ia berpamitan dan menoedjoe ka Louw-an-san. Pada sasoe-danja ia masoek di moeloetnja itoe goenoeng sakoetika lamanja, ia liat di bawah soeatoe gombolan poehoen ada soeatoe batoe besar, di atas mana ada berdoedoe satoe orang dan di pinggirnja itoe orang ada terletak satoe botol arak dan bebrapa bidji boewah-boewah. Kamoedian ia gelogok itoe arak dari moeloet-botolnja dan sembari minoem sembari makan boewah, sembari makan sembari mengomong sendirinja.

„Tida heran djika orang bilang segala apa soeda dipastiken lebih doeloe," begitoelah ia berkata sendirian. „Ini pagi dalem akoë poenja kantong tida mempoenjai oewang barang sapeser boeta: tapi kabetoelan akoë bertemoë sama Oet-tie Tay siok, jang baroe poelang dari Lam-yang-hoe. Lantaran akoë taoë bahoewa ia itoe ada soeatoe malaekat oewang jang hidoep, laloe akoë membri hormat dengen berloetoet dan mendjoera. Ia lantas kasi persen akoë tiga tael perak, malah ia tambahin lagi tiga ratoes oewang tembaga bolong, katanja boewat akoë membeli sedikit makanan dan minoeman. Saoepamanja akoë ini hari tida katemoeken ianja, wah, tentoelah moesti ikat peroet kentjeng-kentjeng!"

Sahabisnja berkata begitoe ia lantas tertawa besar. Yauw Tjeng lantas madjoe menghamperi dan menepok iapoenja sabelah poendak.

„Hei Lo-sam, kaeo plesir betoel, enak-enakan minoem arak sendirian sadja," kata ia.

Ini orang jang diseboei Lo-Sam, ada kapala-kampoeng dari Pi-pa-kok, namanja Ong Tit dan di waktoe ketjil diseboet Sam-dji. Itoe waktoe ia berpaling dan kenalin pada Yauw Tjeng.

„Ach, Yauw Thauw-nia,” kata ia, „marilah kita sama-sama minoem ini arak jang akoe dapetken dengan zonder kaloewarken oewang. Hajolah, kae boleh moelai menioep trompet.”

„Di sini mana ada trompet?” menanja Yauw Tjeng.

„Och, kae tida mengarti! Kaloe minoem arak diglogok dari moeloet-botolnja, itoelah jang dinamaken menioeptrompet.”

Dalem hatinja Yauw Tjeng berpikir, kaloe ia tanjakan oeroesanuja Oet-tie Liang di sini, belon tentoe apa ia maeo tjeritaken atawa tida; taro kata ia maeo tjeritaken, djoega belon tentoe apa soenggoe-soenggoe atawa tida. Sebab kaloe ia bitjara tida betoel, akoe tida sanggoep pikoel itoe kasalahan. Maka ada lebih baek akoe adjak sadja ia pergi ka sana boewat kasi katerangan sendiri. Tapi kaloe ia tida maeo dan bikin riboet, habis bagaimana? Akoe moesti pantjing ia sampe di soeatoe tempat jang sedikit djae, kamoedian dengan zonder banjak bitjara lagi akoe panggoel ia dan bawa pergi. Sasoeanja ia berpikir tetap lantas berkata: „Lo-sam, mari sini, akoe maeo bitjaraken soeatoe oeroesan penting.”

Ong Tit lantas berbangkit dan menghamperi bebrapa tindak. „Tjeritakenlah, apa jang kae maeo bilang.”

„Kaeo madjoe lagi brapa tindakan,” kata Yauw Tjeng.

Ong Tit menoeroeti sabagaimana telah diminta; tapi Yauw Bengeo berdjalan teroes dan berkata lagi: „Mari kita djalan lagi bebrapa tindak, akoe maeo bitjara bisik-bisik sama kaeo.”

Begitoelah sampe bebrapa kali dioelangken, sahingga sampe di sabelah loewarnja itoe moeloet djalanan Louw-an-san. Hal mana soeda membikin Ong Sam djadi koerang senang dan berkata: „Sabetoelnja kaeo maeo bitjaraken oeroesan apa sih?”

Dengen katjepatan seperti kilat, Yauw Tjeng menjengkilit sama kakinja, ampir dalem sa'at itoe djoega Ong Tit lantas djato meloso ka tanah. Kamoedian Yauw Tjeng lantas memboeka itoe kapala-kampoeng poenja tali pinggang, jang di-

goenaken boewat meringkoes kadoewa tangannya itoe orang.

„Hei, kaeo ikat akoe perloenja boewat bitjara bisik-bisik di koeping akoe?“ menanja itoe kapala-kampoeng.

Yauw Tjeng tida mendjawab, hanja lantas panggoel sama itoe orang jang soeda teringkoes dan dibawa pergi ka djoe-roesan Dji-tjan-tin dan teroes masoek ka dalem roemah makan Sam-gie-tiam.

„Itoe bebrapa taydjinn sekarang ada di mana?“ menanja ta pada salah-satoe penggawe itoe roemah makan.

„Ada di dalem roewangan besar,“ djawab itoe penggawe jang merasa heran meliat Yauw Tjeng memanggol saorang teringkoes.

Yauw Tjeng berdjalan teroes ka dalem dan lepaskan itoe kapala-kampoeng ka atas djoebin koetika ia soeda sampe di itioe roewangan. Koetika Tjhio Peng menanjaken siapa ada nja itoe orang jang ia bawa, Yauw Tjeng lantas berkata : „Ini orang bernama Ong Tit dan mendjadi kapala-kampoeng ari Pi-pa-kok. Semoewa hal dalem itoe goenoeng ia ada- daoe dengen terang.“

Tjhio Peng lantas soeroe orang bangoenin Ong Tit dan boekain iapoenja tali ringkoesan.

„Siapa kaeo poenja nama?“ menanja Tjhio Peng.

Ong Tit itoe waktue djadi sanget katakoetan dan njalinja petjah. Ia tida taoe soeda terdjadi perkara apa, makanja ia dibawa begitoe roepa oleh Yauw Tjeng. Itoe pertanjan di- oelangken bebrapa kali, baroelah itoe kapala-kampoeng bisa mendjawab tapi tida karoean djoentroengannya.

„A . . . a . . . koe . . . didise . . . booeet Ong Tit . . . Yauw- yauw Thauw-nia maeo bitjara bisik-bisik di akoe poenja koeping ; tapi tida taoenja diringkoes dan teroes dipanggol ka sini.“

Semoewa orang jang berada di sitoe djadi geli mendenger itoe katerangan.

„Dan akoe kapala-kampoeng di Pi-pa-kok,“ Ong Tit melandjoetken bitjaranja, „Belon taoe toewan ini siapa?“

„Kaeo tida perloe menanjaken akoe,“ kata Tjhio Peng ;

„tjoba kae liat sadja di sana ada berdoedoek kae poenja Tihoe Taydjinn dan akoe menggantiken kae poenja taydjinn bikin pertanjaan pada kae. Apa kae kenal pada Oet-tie Liang, itoe pendoedoek di Pi-pa-kok?“

„Kenal. Ia ada akoe poenja Taysiok dan berlakoe manis sekali padakoe. Ini hari ia baroe balik poelang dari Lamyang-hoe dan telah kasi akoe presen tiga tael perak dan tiga ratoes tangtjhie. Memang ia selamanja soeka mengasi presen oewang padakoe. Baroesan kita poenja Thauw-nia liat sendiri akoe lagi minoem arak jang enak beli sama itoe oewang, jang akoe dapet presen dari itoe Oet-tie Taysiok. Apa tocan kenal padanja?“

„Tida, akoe tida kenal padanja. Kita orang maoe menangkep padanja, kerna ia soeda mentjoeri baginda keizer poenja barang. Bagoes sekali djika ia megansi oewang pada kae.“

Ong Tit satelah mendenger itoe omongan, kapalanja sabagi djoega digoejoer sama ijs dan soemangetnja terbang tiga-perampatnja.

„Tida, akoe tida kenal padanja!“ berseroeh ia. „Itoe arak djoega akoe beli dari akoe poenja oewang sendiri.“

„Baroesan kae sendiri jang telah bilang ia kasi presen oewang pada kae,“ kata Tjhio Peng „sekarang mendadakan kae maoe poeter omong, itoelah tida bisa, sobat!“

„Baroesan akoe poenja omongan ngatjo lantaran sinting, maka tida boleh dianggep betoel,“ kata lagi itoe kapala-kampoeng jang sanget katakoetan.

„Sekarang kita boleh tida oesa bitjaraken itoe oeroesan,“ kata Tjhio Peng. „Akoemaoe taoe apa ini waktoe itoe pendjahat ada di roemahnja?“

„Boleh djadi djoega ada di roemahnja, tapi boleh djadi djoega ia soeda pergi ka laen tempat,“ kata itoe kapala-kampoeng. „maka sekarang akoe maoe pergi liat, djika betoel ia ada di roemah, dengan lekas akoe balik kombali kasi kabar.“

Sahabisnja berkata ia lantaspalikin badannja maoe berlaloe.

„Hei, brenti!” menjentak Tjhio Peng. „Kaoe tentoe maoe pergi kasi kabar padanja, boewat membales iapoenja kabae-kan jang soeda kasi kaoe presen tiga tael perak. Hajo, oppas, pegang padanja dan djangan kasi ia pergi ka mana-mana.

„Di sini ada iapoenja tali pinggang, boleh kasiken ia pake lagi.”

Kamoedian Tjhio Peng lantas panggil itoe doewa soedara Heng.

„Kaoe berdoewa pergi ka dalem itoe goenoeng boewat meliat gelagat doeloe,” kata ia pada itoe doewa orang.

Heng Djoe Liong dan Heng Djoe Houw djadi melongo sebab kaget.

„Doeloean djoega akoe soeda bilang,” kata jang toewahan, „bahoewa kita berdoea poenja ilmoe kapandean ada terpaet djaoe sekali sama ianja. Lagian ia ada mempoenjai itoe pe- dang wasiat jang sanget lihay. Laen dari itoe ia ada banjak lebih pinter dari kita berdoewa. Kaloe sadja ia bisa tebak kita poenja maksoed, pasti sekali kita berdoewa aken binasa dalem iapoenja tangan. Kita berdoewa mati tida terlaloe penting, tapi sabaliknja aken membikin gagal taydjinn poenja oeroesan.”

„Itoe tida djadi apa,” kata Tjhio Peng, jang kamoedian lantas menghamperi pada itoe doewa soedara dan bitjara bisik-bisik di deket iaorang poenja koeping. „Akoerasa de- ngen begitoe, pasti sekali kaoe orang tida mendapet soesa apa-apa,” kata lagi Tjhio Peng achirnja.

FATSAL XXI.

Tapi itoe doewa orang lantas keroetken halisnja dan berkata : „Akoë masi koewatir koerang sampoerna ; kaloë sadja ia tida maoë dengeri kita poenja omongan itoe, habis bagaimana ?“

„Kaloë ia tida maoë dengerin kaoë poenja omongan tadi itoe, akoë adjarin lagi soeatoe omongan,“ berkata sampe di sini, kombali Tjhio Peng bisik-bisik di koepingnja itoe doewa orang.

Sekarang itoe doewa soedara Heng baroe oendjoek moeka girang.

„Ja, ja, betoel, bagoes!“ kata iaorang dengen berbareng. Begitoelah iaorang lantas membekal masing-masing poenja sendjata dan berpamitan pada orang-orang di sitoe, teroes kaloëwar dari itoe roemah makan. Pada sasoedanja itoe doewa soedara berangkat, Tian Him Hoei jang djoedjoer merasa tida tahan boewat tida memboeka soewara.

„Tjhio Sieko,“ kata ia, „itoe doewa orang poenja kapan-dean sanget berwates dan satoe kali ini kaoë soeroe iaorang pergi ka sana, djangan-djangan iaorang aken mendapet tjilaka.“

„Tida apa, akoë soeda mempoenjai satoe daja bagoes,“ djawab Tjhio Peng.

Djoestroe pada waktoe orang lagi bitjara, mendadak kaliatan Pang Tjongpeng mendatengin dari loewar bersama doewa orang laen. Dan itoe doewa orang poenja dandanan lantas bisa dikenalin sabagi officier dari balatentara negri, sebab ada ampir bersamahan sama itoe Tjongpeng.

Semoewa orang pada berbangkit dari tempat docdoeknja boewat menjamboet pada itoe tiga tetamoe. Tjhio Pang lantas adjar kenal Thio Liong, Tio Houw dan Pang Jan sama Pang Tjin Kang Tjongpeng. Di laen fihak itoe Tjongpeng adjar kenal pada Tjhio Peng dan Tian Tjiauw itoe doewa orang jang ia bawa, jang satoe bernama Thio Kan berpangkat Touwsie dan jang laennja bernama Hoo Hoei berpang-

kat Sioepie. Tjhio Peng menanjaken iaorang ada membawa bebrapa banjak orang.

„Doewa ratoes soldadoe kaki dan semoewanja soeda me-noenggoe di tempat berdekatan dari sini,“ manerangken Pang Tjin Kang. „Iaorang bersedia boewat menerima prentah dan bisa berangkat dalem segala waktoc,“

„Masi ada soeatoc hal,“ kata Tjhio Peng. „Nanti pada sa-soedanja waktoc maoe bertempoer, iaorang semoewanja moesti memake satoc pertandahan kaen poetih atawa biroe di ia-orang poenja kapala, sebab koeawatir tida kakenalan, djadi kena memboenoch erang sendiri.“

„Kaloec soeda sedia kita moesti lantac bergerak,“ kata Tian Him Hoei. „Sebab kita perloe moesti membantocin pada itoc doewa soedara Heng, jang soeda berangkat doeloean, djangan sampe iaorang mendapat tjilaka.“

Kaloec begitoc,“ menjelak Pang Jan, „akoc maoe brangkat ka sekarang, jang boleh dianggep sabagi barisan jang kadoewa.“

„Kita sabagi barisan jang katiga,“ kata Thio Liong dan Tio Houw.

„Kita sabagi barisan jang ka'ampat,“ kata Tjhio Peng pada Lam-hiap. „Sedeng Pang taydjin bersama Thio Touwsie dan Hoo Sioepie berikoc itoc doewa ratoes pasoeakan bala-tentara sabagi barisan jang kalima. Nanti pada waktoc bertempoer, semoewa soldadoe moesti berseroch dengan keras, bahoewa satoc pasoeakan besar dateng menangkep pada itoc pendjahat jang soeda brani melakoeken pentjoerian dalem kraton baginda keizer. Dengan begitoc, sedikitnja bisa membikin itoc kawanana pendjahat djadi kaget dan katakoetan, hingga menggampangken kita poenja pakerdjahan.“

Pang Tjongpeng dan iapoenja doewa officier sabawahan manggoetken kapala serta menjanggoepin. Kamoedian Tjhio Peng minta Tji Tihoc mengepalai iapoenja oppas-oppas dan itoc doewabelas kapala oppas jang dibawa dari Khay-honghoe boewat membantoc dari sabelah blakang. Pada sasoe-danja semoewa diatoer beres, marika itoc lantac pada berangkat. Tjoba sekarang kita tengok pada Heng Djoe Liong dan

Heng Djoe Houw jang brangkat paling doeloe ka Louw-an-san. Sasoedanja ia masoek ka dalem moeloetnja itoe goe-noeng dan teroes ka Pi-pa-kok, marika sampe di hadapan roemahnja Jan Hoei alias Pek Kiok Hoa. Di kadoewa ping-giran pintoe depannja itoe roemah ada doewa bangkoe pan-djang dan itoe waktue ada berdoedoek bebrapa orang di sitoe sembari pasang omong ka Timoer. Heng Djoe Liong dan soedara moedanja lantass menghampiri pada marika itoe.

„Ma'af, akoe menoempang tanja,“ kata jang toewahan.

Itoe orang-orang meliat pada itoe doewa soedara jang roe-panja djelek dari atas sampe kabawah, bebrapa sa'at lamanja.

„Maoe tjari siapa?“ menanja salah-satoe di antara marika itoe.

„Akoee maoe bertemoee sama kaeo orang poenja Tay-ya,“ djawab Heng Djoe Houw.

„Akoee baroe poelang verlof dan belon masoek ka dalem, djadi akoe tida taoe apa Tay-ya ada di roemah atawa tida,“ kata itoe orang. „Akoee maoe pergi liat ka dalem doeloe, kaloe ada akoe nanti kasi kabar.“

„Sobat, kaeo boleh kasi taoe pada kaeo poenja Tay-ya, bahoewa kita berdoewa bernama Heng Djoe Liong dan Heng Djoe Houw, sedeng kaeo poenja Tay-ya ada mendjadi akoe poenja soeheng. Kaloe kaeo bilang begitoe, tentoe ia moesti maoe katemoeken akoe.“

Itoe orang lantass masoek ka dalem, tida antara lama kamoedian lantass ada kaloewar saorang laen jang melongok ka loewar, tapi lantass balik masoek lagi ka dalem. Pada sasoedanja menoenggoe bebrapa lamanja, baroe kaloewar lagi saorang laen dan oendang itoe doewa soedara Heng masoek ka dalem, kamoedian membiloek ka Selatan di mana ada terletak satoe pedengan angin. Di sabelah Oetara ada lagi soeatoe pintoe, koetika maoe masoek ka itoe pintoe, kaliatan Pek Kiok Hoa toeroen dari tangga batoe boewat menjamboet itoe doewa orang poenja kadatengan.

„Kadoewa soedara, apa selama ini ada banjak baek?“ menegor toewan roemah.

„Trima kasi banjak,“ djawab Heng Djoe Liong, „kita mengandel pada Toako poenja redjeki ada baek djoega. Dan akoe harep sadja Toako sendiri poen selamanja itoe ada slamat tida koerang satoe apa. Bebrapa lama ini, lantaran kita sanget repot sama kita poenja „peroesahan,“ djadi tida ada tempo boewat membri hormat pada Toako di sini; sekarang di bilangan Liauwtong ada soeatoe pakerdjahan jang bisa mengasi kaoentoengan, kabetoelan kita liwat di sini, dengan memoeter akoe sengadja dateng boewat membri hormat.”

Koetika itoe doewa soedara Heng maoe berloetoet, Pek Kiok Hoa lantas menjekal itoe doewa orang poenja lengan dan diangkat ka atas dan teroes dipimpin naek ka atas itoe tangga batoe masoek ka dalem satoe kamar-tetamoe, di mana iaorang mengambil tempat doedoek. Soeda djadi biasanja, bila Jan Hoei katemoeken ini doea orang, ia sendiri berdoedoek di tengah-tengah dan itoe doewa soedara Heng mengapit dari doewa pinggirin.

Itoe doewa soedara Heng awasi Pek Kiok Hoa, jang itoe waktoe kaliatannya terlebih keren dan garang. Ia memake boengkoesan kapala boeseng jang terbikin dari soetra poetih dengan wiroe-wiroean meroepaken kembang, sedeng iapoenja badjoe terbikin dari soetra poetih jang tersoelam dan memake pinggirin emas, sedeng iapoenja badjoe dalem terbikin dari soetra idjo daon memake soelaman kembang besar. Iapoenja moeka jang boender tida berbeda sabagi dipoepoerin, kadoewa halisnja bagoes dan lemas, sedeng iapoenja kadoewa mata galak dan bertjahaja; idoenja bangir, bibir merah dan giginja sabagi doewa baris moetiara. Tapi, biar poen romannja tjakep, toeh iapoenja koelit moeka poetihnja poetjat dan ada bebrapa banjak teroetoean dan moeloetnja ada sedikit mentjong. Di iapoenja pinggang ada tergantoeng satoe pokiam jang tadjemnja di kadoewa fihak, terboengkoes dalem satoe saroeng koelit ikan tjoetjoet jang berwarna idjo dan memake rombe-rombe dari benang soetra koening. Sadari moelai bertemoe Jan Hoei teroes oendjoek iapoenja moeka jang berse-

njoem dan sampe pada waktoe berdoedoek, djoega ia masi teroes haha hihi tertawa sembari menanjaken perjalanannya itoe doewa orang.

„Berdoewa Hiantee poenja kadatengan dari tempat jang begitoe djaoe“, kata ia, „apa tjoema perloe dateng menengokin pada akoe sadja atawa ada lagi laen oeroesan?“

„Pertama kita hendak menengokin pada Toako,“ kata Heng Djoe Liong, „kadoewa masi ada lagi soeatoe perkara ketjil jang tida terlaloe penting, hal mana kita ingin menda-pet taoe“

Koetika Heng Djoe Liong baroe bitjara sampe di sini, lantas kaliatan Pek Kiok Hoa tertawa berkakakan.

„Akoewo soeda mendoega bahoewa kadoewa Hiantee poenja kadatengan,“ kata ia, „tentoe boekannya meloeloe boewat dateng menengokin padakoe dan ada oeroesan laen lagi jang lebih penting. Sekarang tjoba kadoewa soedara soeka toetoerken dengan teroes-terang sadja.“

„Kita denger kabar angin soeatoe hal, jang mana kaloe kita menanjaken pada Toako, tentoe lantas bisa katahoean benar atawa tidanja,“ kata lagi Heng Djoe Liong.

„Sabetoelnja oeroesan apa sih?“ menegasken Pek Kiok Hoa.

„Kita denger orang-orang dari golongan lioklim rame bitjaraken bahoewa kae soeda tjoeri baginda keizer poenja saprangkat pakean karadjahan, belon taoe apa ini perkara betoel atawa tida?“

Kembali Jan Hoei djadi tertawa bergelak-gelak.

„Benar, itoe hal memang sasoenggoenja telah terdjadi.“ kata ia achirnja. „Ini perkara lantaran di medan perdjamoean makan dipandang enteng oleh saorang laen, soeda membikin akoe djadi sanget mendongkol dan brangkat ka kota radja boewat mentjoeri baginda keizer poenja saprangkat pakean karadjahan itoe. Tapi ini semoewa lantaran oemoer moeda dan darah panas, dalem satoe waktoe koerang pikir lantas sadja lakoeken itoe perkara terlarang dan ini waktoe sekali-poen akoe merasa menjesal djoega tida ada goenanja. Berdoewa soedara bagaimana bisa taoe ini hal?“

„Kita denger kabar angin dari orang-orang jang mendjadi kita poenja golongan,” kata Heng Djoe Liong, „tjoema sadja tadinja akoe tida brani pastiken apa itoe perkara memang betoel atawa tjoema kabar angin jang tida berdasar sadja dan ini hari satelah mendenger Toako poenja katerangan, baroe lah akoe taoe bahoewa itoe hal memang sasoenggoenja terdjadi. Tjoema sadja kae soeda bisa melakoeken itoe perkara besar dan bikin djato perboewatannja orang-orang jang ternama, apa sebabnja kae djadi menjesel? Akoe boekannja memoedji Toako di depan moeka, kaoem lioklim di saloeroe negri boekan sedikit djoemblanja, tapi djangan kata ada jang bisa mentjoeri saprangkat pakean karadjahan dari baginda keizer, biar poen di dalem kraton poenja satoe poehoen atawa roempoet, djoega tida ada jang mampoe tjoeri. Tapi sekarang kae soeda bisa mentjoeri baginda keizer poenja pakean karadjahan, itoelah haroes sekali kita berdoewa menghatoerken slamet pada kae, sebab kae boleh dibilang mendjadi djago dari semoewa djago!”

„Apa ini boekannja soeatoe perboewatan jang salah?” menanja Jan Hoei.

„Masa perkara jang saroepa ini bisa dibilang salah!” kata Heng Djoe Liong.

„Akoen senantiasia berkoewatir bahoewa akoe soeda melakoeken satoe perboewatan jang salah dan salahnja besar sekali,” kata lagi Jan Hoei.

„Kae poenja perboewatan jang begitoe mendedjoetken dan menggemparken,” kata Heng Djoe Houw jang dari satadian tinggal boengkem sadja, „tjara bagaimana bisa dibilang salah? Orang jang seperti kita berdoewa, djangan kata mampoe tjoeri, liat sadja belon taoe liat. Toako, lantaran kae poenja kapandean tinggi dan kabranian lebar, akoe mae memindjem kae poenja hawa boewat toeroet meloewasken akoe poenja pemandangan mata. Maka akoe sanget harep soepaja Toako soeka bawa kaloewar kasi kita orang menjaksiken bagaimana roepanja pakean karadjahan dari soeatoe keizer.”

Kembali Pek Kiok Hoa tertawa.

„Sajang kaeo dateng terlaloe laat,“ kata ia, „tjoba kaloe kaeo dateng lebih siang, nistjaja kaeo orang masi bisa meliat. Dengan sabetoelnja akoe maoe kasi taoe pada kaeo, koetika akoe lagi makan-minoem dalem pesta perdjamoean-nja Hok-tee-koen-ong, Tong-hong Liang, di kota Thwan-shia-tjoe, bilangan Lam-yang-hoe, itoe waktoe orang banjak bitjaraken bahoewa dalem ini djeman djarang ada djaga jang bisa membikin orang banjak djadi taloek dan kagoemin. Salah-satoe orang dengan maen-maen bilang bahoewa Tong-hong Toako tergelar Hok-tee-koen-ong, kaloe ada orang jang brani pergi masoek ka dalem kraton keizer dan tjoei saprangkat pakean karadjahan, kasiken Tong-hong Toako pake boewat mendapet taoe apa ia soeroep atawa tida sabagi satoe radja; dan itoe orang jang bisa mentjoei itoe pakean dengan sasoenggoenja bisa teritoeng sabagi soeatoe djago jang djempolan.

„Itoe waktoe lantaran tida ada orang jang brani mendjawab, tambahan akoe soeda terkena pengaroenja aer kata-kata, dengan tida berpikir pandjang lagi akoe lantás menjanggoepin, bahoewa akoe maoe tjoba pergi ambil itoe pakean karadjahan. Itoe hal kaloe boekannja kabetoelan hari tahonnja baginda keizer, belon tentoe akoe bisa dapetken dengan begitoe gampang. Sebab itoe pakean lebih doeloe telah dikaloewar-ken dari goedang dan ditaro dalem itoe roewangan Keh-ietian, soepaja di hari berikoetnja gampang dipake. Begitoeelah dengan tida banjak soesa akoe soeda bisa tjoei itoe barang dan zonder ada soeatoe manoesia jang mendapet liat. Boewat memenoehken djandji, akoe pergi anterken itoe pakean pada Tong-hong Toako dan ini hari akoe baroe sadja balik poelang dari Lam-yang-hoe. Kaloe sadja kaeo berdoewa dateng kamaren, tentoe tida aken bisa bertemoe sama akoe.“

„Ach, masa begitoe kabetoelan dan apa betoel soeda tida ada di sini?“ menanja Heng Djoe Houw.

„Masa akoe maoe djoestaken kaeo orang,“ djawab Pek Kiok Hoa, „djika memangnja masi ada di sini, masa kanapa sih kaloe akoe kasi liat pada kaeo berdoewa?“

Itoe doewa soedara Heng jang tida bisa oempatkan peng-
rasahan hatinja, lantas oendjoek iapoenja roepa jang poetoos
harepan dan satoe sama laen saling awasi dengan tida bisa
berkata satoe apa. Pek Kiok Hoa jang tjerdik dan bermata
tadjem, lantas sadja mengarti marika poenja maksoed. Tapi
ia tinggal teroes oendjoek moeka manis dan bersenjoem-
senjoem.

„Kaoe berdoewa [hatoerken slamet pada akoe,“ kata ia,
„sabaliknja akoe poen haroes hatoerken slamet pada kaoe
berdoewa, baroelah patoet, sebab kaoe berdoewa poenja hal
sasoenggoenja haroes sekali diboeat girang dan dihatoerken
slamet.“

„Kita berdoewa ada mempoenja oeroesan apatah, jang
boleh diboeat girang dan dibri slamet?“ menanja itoe
doewa soedara Heng.

„Kaoe berdoea boekantah sekarang soeda mendjabat pa-
kerdjahan negri, pangkat Liok-pin Hauw-Wie, di bawah pren-
tahnja Khaij-hong-hoe? Dengan begitoe, di blakang hari
boekantah aken mendapat djoeba merah brikoet tali ping-
gang mas, jang bisa membikin terang namanja leloehoer?
Inilah baroe bisa dianggap sebagai perkara jang menggirang-
ken dan haroes sekali dihatoerken slamet.“

Itoe doea soedara Heng mendenger itoe omongan lantas
bersenjoem.

„Kiranja kaoe soeda mendapat taoe bahoewa kita orang
telah mendapat pangkat?“ kata iaorang dengan berbareng.

„Boekan sadja akoe taoe,“ kata Jan Hoei, „malah semoea
orang poen taoe hal itoe. Sekarang tentoe kaoe mendja-
lanken kaoe poenja kawadjaban dateng ka sini boeat minta
kombali baginda keizer poenja pakean kabesaran, sekalian
menangkep akoe boeat dibawa ka kota radja, boekantah
betoel begitoe?“

„Masatah akoe brani berboeat begitoe!“ Kata Heng Djoe
Liong. „Tjoema sadja lantaran sekarang kaoe soeda men-
dapat taoe kita poenja kaädahan, kaloe sadja kaoe mae
kasiken itoe barang jang kaoe telah tjoeri, boekan sadja kaoe

tida aken mendapat hoekoeman, malah ktia berdoewa dengan keras aken kasi voorstel dan menangoeng soepaja kae bisa mendjabat pakerdjahan negri baroelah kita poenja hati mendjadi senang. Inilah jang dinamaken sama-sama senang dan sama-sama djaja."

"Toetoeop kae poenja moeloet! Apabila akoe kasiken itoe pakean karadjahan jang akoe tjoeri, masatah masi ada harepan mendapat pangkat? Paling enteng djoega akoe aken dikasi hoekoeman tabas batang leher! Apa kae kira akoe anak ketjil maoe didongengin begitoe roepa?"

"Och, kaloe begitoe kae tida taoe, bahoewa baginda keizer jang sekarang paling soeka sama orang jang mempoenjai ilmoe kapandean silat. Doeloean Pek Giok Tong telah tinggalin soerat sama golok di Khaij-hong-hoe, menoelis sairani di temboknja Tiong-Gie-Soe, bikin riboet dalem gedongnja Bang Tayhoe, masoekin sapotong toelisan dalem soerat rekestnja itoe ambtenaar dorna, dan paling blakang ia tjoeri djoega Siangya poenja Sam-po; tapi toch ia boekannja gie-tjian Hou-Wie. Apabila kae kasi kembalikan itoe barang jang kae tjoeri, tentee Siangya aken voorstel dan tanggoeng kae mendjabat pakerdjahan negri, masatah bisa salah lagi?"

"Lekasan toetoeop kae poenja moeloet, anak gila," kata Jan Hoei. "Tatkala baginda keizer mengasi pangkat pada Pek Giok Tong, tida perna diseboet dengan terang bahoewa apabila kamoedian ada terdjadi lagi perkara jang saroeapa itoe, aken mendapat lagi itoe kalonggaran sebagaimana djoega Pek Giok Tong, malah sebaliknja bakal dihoekoem dengan bengis."

Itoe semoea omongan jang dioetjapken oleh kadoea soedara Heng, sama-sekali ada adjarannja Tjhio Peng. Soeda tentoe sadja iaorang tida bisa bitjara lebih banjak dari apa jang telah diadjarin, maka itoe waktue lantassadja iaorang berpamitan boeat berangkat poelang.

"Och, itoelah tida bisa, sobat-sobat!" menjega Pek Kiok Hoa. "Kae orang tjoea bisa masoek ka sini, tapi djangan

harep boeat bisa kaloewar lagi, salaennja orang tinggalken
kaoe orang poenja kapala disini."

Itoe doea soedara Heng djadi bingoeng dan djengkel.
„Jan Hoi kaeo ini sasoenggoenja brani mati sekali; djika
dengen satjara baik kaeo tida maoe menoeroet, terpaksa
kita orang maoe menangkep pada kaeo!" Seabisnja berkata
begitoe, itoe doea soedara lantas malepasken iaorang poenja
djoeba pandjang dan menghoenoes golok, kamoedian ber-
lompat kaloewar lataran sembari memaki kalang-kaboetan.
Sebab di lataran jang lega, iaorang bisa bertaroeng dengan
laloewasa.

FATSAL XXII.

Pek Kiok Hoa dengan adem malepaskan iapoenja djoeba dan menjaboet iapoenja pedang, kamoedian ia poen berlompat ka loewar lataran, memboeroe pada itoe doea soedara Heng. Pertama Heng Djoe Liong membatjok sama iapoenja golok ka djoeroesan moekanja Jan Hoei, jang lanats berkalit dan berbareng dengan itoe menoesoek sama pedangnja dengan satoe tipoe jang dinamaken „Pek-Tjoa-touw-Sin.“ Heng Djoe Liong lantas kelitken kapalanja ka kanan, tapi tida oeroeng mata kirinja kena tertoesoek oleh oedjoeng pedangnja Pek Kiok Hoa hingga iapoenja bidji mata tertjoekil kaloewar, dan dengan berloemoeran darah ia djato roeboeh ka moeka boemi.

Pek Kiok Hoa lantas memboeroe pada Heng Djoe Houw, jang satelah meliat soedara toeanja roeboeh dengan berloemoeran darah, lantas menerdjang dengan satoe toesoekan golok. Jan Hoei dengan sabar menangkis sama iapoenja pedang. Trang! Soewaranja Heng Djoe Houw poenja golok jang patah djadi doea dan dengan tida mengasi tempo lagi Pek Kiok Hoa batjokin iapoenja pedang ka djoeroesannja iapoenja tandingan Heng Djoe Houw lantaran tida mempoenjai lagi sendjata jang bisa digoenaken boeat menangkis, lantas sadja ia timpoekin itoe goloknja jang tinggal sapotong pada Pek Kiok Hoa. Itoe penjahat terpaksa oeroeng membat:ok, sebab ia moesti berkelit boeat kasi liwat itoe timpoekan.

Heng Djoe Houw mendapat ini koetika, maoe balikin badannja oeloer iapoenja tindakan boeat maboer, tapi Jan Hoei dengan tjepet soeda goenaken lagi itoe tipoe „Pek-tjoa-touw-sin,“ menoesoek ka djoeroesan dadanja Heng Djoe Houw. Oleh kerna Pek Kiok Hoa poenja gerakan begitoe sebat, Heng Djoe Houw tida kaboeroe berkelit dan terpaksa goenaken iapoenja tangan kiri menjampok pada itoe pedang. Tjoema kadengeran satoe soewara „Srat!“ lantas sadja ampat djeridjinja Heng Djoe Houw djadi koetoeng saparonja. Jan Hoei barengin menendang jang mengenakan badannja iapoenja soetee dan troes djato meloso.

Jan Hoei kasi prentah orang-orangnja boeat meringkoes pada itoe doea orang, kamoedian ditaro di bawan emper. Itoe waktoe Pek Kiok Hoa merasa sanget menjesel, mengapa ia soeda berlakoe begitoe kaboeroe napsoe pada sablonnja menanjaken dengan terang itoe doea orang dateng sama brapa banjak kawan, lantas sadja goenaken kakerasan. Sebetoeinja koetika orangnja kasi taoe atas kadatengannja itoe doea orang, lantas sadja ia mengarti dengen maksoed apa doea orang itoe mentjari padanja. Sebab koetika ia pergi ka kota radja boeat mentjari itoe pakean karadjahan, ia soeda taoe di Khay-hong-hoe ada brapa orang jang bakerdja dan siapa satoe-satoenja orang-orang itoe. Maka baroesan ia soeda soeroe orangnja pergi kaloewar dan tengok itoe doea soedara Heng ada membawa brapa banjak orang, dan inilah ada itoe jang melongok kaloewar dan lantas masoek kombali mengasi kabar pada Jan Hoei bahoea itoe tetamoe tjoema berdoewahan sadja.

Sekarang pada sasoedanja itoe doea orang dibikin loeka begitoe roepa, biarpoen ditanja djoega, tentoe tida maoe tjerita dengen sateroesnja. Tapi Pek Kiok Hoa maoe tjoba djoega, biar poen moesti goenaken lagi kakerasan. Maka ia lantas balikin badannja dan berkata pada itoe doea orang: „Kaoe berdoea mendapet itoe loeka-loeka berat, semoeanja lantaran kaoe orang jang tjari tjilaka sendiri. Dengen baek akoe kasiken kaoe orang masoek ka dalem roemahkoe, tapi kaoe orang sebaliknja soeda mengoetjapken omongan jang koerang-adjar dan menjaboet golok boeat bertanding padakoe. Kaloe boekannja akoe menginget itoe persoedarahan dari satoe goeroe, nistjaja lebih siang akoe soeda anterken kaoe orang poenja djiwa ka acherat. Sekarang kaloe sadja kaoe maoe bitjara jang pantes dan menoeroet atoeran, akoe maoe lepaskan kaoe orang berlaloe dari sini. Djawablah akoe poenja pertanjahan dengen sadjoedjoernja, kaloe sadja kaoe orang masi sajang djiwa.“

„Kaoe maoe tanjakan apa pada kita orang? “menanja Heng Djoe Houw.

„Kaoe orang datang ka sini sama brapa banjak kawan?“ kata Jan Hoei. „Dan kaoe orang poenja kawan-kawan itoe sekarang tinggal di mana? Kaloe sadja kaoe orang bilang dengan teroes-terang, lantas akoe maoe kasiken kaoe berdoea pergi dari sini.“

„Kaoe maoe tanjakan kita orang datang dengan berkawan brapa banjak orang?“ kata Heng Djoe Liong. Tapi pada sablonnja ia bisa landjoetken bitjaranja, sang ade soeda menjelak dengan menahan sakit: „Engko, biar bagaimana djoega, djangan kasi taoe padanja,“ kata sang ade itoe. „Sebab kaloe satoe kali kita kasi taoe, tentoelah ia aken pergi melakoeken pemboenoehan ka sana; kita berdoea mati boekanja perkara jang terlaloe penting, tapi djangan bikin laen orang mendapet katjilakahan.....“

Tatkala Heng Djoe Houw bitjara sampe di sini, mendaftak di sabelah loewar kadengeran soewara riboet-riboet, tapi Pek Kiok Hoa tida ambil perdoeli dan mengantjem pada itoe doea orang sama pedangnja..... Koenjoeng-koenjoeng dari atas tembok ada berlompat toeroen satoe orang, jang memake badjoe merah, sedeng di moeloetnja tida brentinja menjeboet: „Aja! aja!“ soeara dialect Selatan: „Bangsat koerang-adjar, djahanam jang terkoetoe! Kaoe orang perna soedara dalem satoe ilmoe pladjaran, tapi bisa memake hati jang begitoe kedjem; Korek orang poenja bidji mata dan koetoengin orang poenja djeridji tangan. Marilah datang ka sini trima binasa, pendjahat jang terkoetoe!“

Pek Kiok Hoa jang itoe waktoe lagi berdiri di atas tangga batoe, lantas berlompat toeroen ka lataran dan menanja: „Kaoe ini siapa?“

„Kaloe kaoe maoe menanjaken akoe poenja nama,“ djawab itoe orang, „akoe orang dari Liauwtong, she Auw-Jang dan bernama satoe hoeroef Tjhoen, dan orang seboet akoe ini Pak-hiap.“

Pek Kiok Hoa djadi sanget terkedjoet. Sebab Pak-hiap biarpoen ia tjoema denger namanja sadja, ia taoe jang itoe orang ada mempoenjai satoe golok-wasiat dan bisa dianggep

sebagi orang gagah nomor satoe di saloeroe negri. Djangan-djangan boekan iapoenja tandingan, maka ia moesti berlakoe sanget hati-hati sekali.

„Hei, Auw-Jang Tjhoen!“ kata Jan Hoei, „Akoek sama-sekali tida bermoesoehan satoe apa sama kae, apa perloenja kae tjari stori sama akoe? Menoeroet akoe poenja pikiran, lebi baek berlaloe sadja dari sini.“

„Djangan banjak batjot, trima akoe poenja golok ini!“ berseroe Pang Jan, sebab orang itoe poen boekan laen dari ianja.

Tatkala Pang Jan sampe, dari djaoehan ia liat itoe doea soedara Heng masoek ka pintoe depan; tapi pada sasoedanja ia menoenggoe lama djoega, blon kaliatan itoe doea soedara kaloewar lagi, lantas ia paksa maoc masoek ka dalem. Koetika ditanja oleh penjaga pintoe, ia maoc tjari siapa. „Maoc tjari Pek Kiok Hoa,“ djawab Heng Jan.

„Di sini tida ada Pek Kiok Hoa (kembang seroeni poeti), tapi kaloek Oeij Kiok Hoa (kembang seroeni Koening) biar poen ada, ini waktoc masi blon megar.“

Pang Jan lantas memaki kalang-kaboet dan tjekal batang lehernja itoe orang kamoedian lantas dikasi persent satoc gaplokan dan ditambah sama satoc tendangan, hingga orang itoe djato berdjoempalitan. Laen-laen boedjang madjoe mengoeroeng padanja, tapi Pang Jan lantas maboer ka djoeroesan Selatan dengen menoeroeti sapandjang pager-tembok. Pang Jan biloek ka Barat, tapi koetika itoe kawanano boedjang mengoeber sampe di sitoc, ternjata itoe orang jang dioeber telah linjap tida kaliatan bajang-bajangnja. Sebab Pang Jan lebih siang soeda berlompat naek dan liwatin itoc pagar tembok.

Sasampenja di sabelah dalem lantas ia berlari menoedjoe ka satoc pintoc taman jang sabelah Salatan dan berlompat naek ka atas satoc pager-tembok pendek, dari mana ia dapet liat itoc doea soedara Heng berlepotan darah dan itoc waktoc djoestroe Pek Kiok Hoa mengantjem sama pedangnja pada itoc doea soedara. Maka ia lantas berlompat toc-

roen dengan mengakoe Pak-hiap, hingga membikin itoe pen-djahat djadi kaget.

Jan Hoei tida brani goenaken iapoenja Tjie-tian-kiam boewat menangkis Pang Jan poenja golok, hanja ia djaga sampe pedangnja beradoe sama moesoehnja poenja sendjata. Begitoelah iaorang bertaroeng sampe lima atawa anam djoeroesan; tapi Pang Jan mendesak teroes: sasoeatoe batjokan atawa toesoekannja tida maoe mengasi hati pada Pek Kiok Hwa jang kena dibikin keder sama iapoenja gertakan, sedang moeloetnja tida brenti memaki kalang-kaboetan. Di laen fihak Jan Hoei sembari bertanding dalem hatinja berpikir: ini orang djangan-djangan boekannja Pak-hiap; sebab Pak-hiap orang kalahiran Liauwtong, jang termasuk Tiongkok poenja bilangan Oetara, tapi ini manoesia poenja lagoe bitjara ada lagoe Selatan. Lagian orang seboet Auw-yang Tjhoen dengan nama gelaran Tji-djiam-pek, lantaran berdjenggot dan berbidji mata blao. Sedeng ini orang sama-sekali tida memake koemis atawa poen djenggot. Akoe moesti djaga djangan sampe kena diakalin menta-menta.

Sahabisnja berkata ia poera-poera membatjok kamoedian teroes berlompat kaloewar dari kalangan dan berseroeh: „Hei, orang asing, toenggoe doeloe sabentaran! Baroesan kae bilang bahoewa kae ini Pak-hiap, Auw-yang Tjhoen; tapi kae poenja lagoe bitjara lagoenja orang Selatan. Lagian Pak-hiap diseboet Tjie-djiam-pek, sedeng kae tida memake koemis atawa poen djenggot. Dengen begitoe, tjara bagaimana bisa soeroep diseboet Pak-hiap?”

„Maoe menangkap pada kae ini, satoe djahanam,” kata Pang Jan, „masatah perloe ia moesti toeroen tangan sendiri. Ia itoe ada mendjadi akoe poenja goeroe dan kasiken iapoenja Tjhit-poo-too padakoe boewat menangkis kae. Pendek, asal sadja akoe ada mempoenjai ini golok wasiat, memboenoeh pada kae tida berbeda sabagi djoega memboenoeh satoe ajam gampangnja.”

„Och, manoesia pengetjoet, mengapa baroesan kae begitoe tida taoe maloe memindjem laen orang poenja nama?”

berseroeh Jan Hoci. „Siapa kae poenja nama jang sabetoel-nja ?”

„Akoë ini ada kae poenja Pang Toaloya,” saot Pang Jan sembari menoesoek sama iapoenja golok.

Pada sasoedanja iaorang bertaroeng lagi tiga atawa ampat djoeroesan, Pek Kiok Hwa, pikir ini orang Selatan poenja omongan banjak djoestanja, sedeng itoe golok jang ia goenaken tida soeroep sama satoe golok djimat. Maka dengan braniken hati ia mae tjoba-tjoba sabetken pedangnja pada Pang Jan poenja blakang golok perlahan-perlahan, boeat mendapat taoë apa benar itoe golok ada soeatoe golok wasiat. Sebab kaloe benar itoe sendjata ada soeatoe barang wasiat, tentoelah tida bisa mempan terkena pedangnja, sebaliknya iapoenja pedang djoega tida sampe mendapet karoesanan, bila dengan sasoenggoenja itoe golok ada soeatoe sendjata wasiat jang lebih koewat dari iapoenja. Pada sasoedanja ia berpikir tetap dan sabagitoe lekas ia mendapet koetika, lantas sadja ia laloeken niatannja itoe. Trang! soewara oedjoeng goloknja Pang Jan jang djadi terpoetoes doewa. Hal mana soeda membikin Pek Kiok Hwa djadi sanget goesar dengan gigit-gigit iapoenja gigi sendiri.

Pang Jan lantas berlompat naek ka atas genteng roemah dan Pek Kiok Hwa soeda tentoe sadja dengan pengrásahan sangat gemas mengoeber dari sabelah blakang. Dalem sa'at itoe djoega itoe pendjahat dapet liat Pang Jan balikin baddannja sembari mengajoen sabelah tangannja; tapi Pek Kiok Hwa jang tjeli dan gesit, dengan tjepat lantas berkelit. Sebab sabagitoe lekas sampe di atas genteng, Pang Jan lantas mengangkat doewa lembar genteng dan koetika meliat Pek Kiok Hwa djoega berlompat naek boewat mengoeber padanja, ia lantas timpoekin itoe genteng ka djoeroesan moekanja itoe pendjahat. Tapi lantaran Jan Hoci poenja gerakan badan ada sampe sebat, itoe timpoekan tida bisa mengenaken padanja dan djato ka moeka boemi.

„Aja, aja,” berseroeh Pang Jan, „inilah dengan sasoenggoenja akoë poenja goeroë jang dateng!”

Pek Kiok Hwa itoe waktoe soeda toeroen lagi ka moeka boemi, lantas sadja balikin badannja boewat meliat pada itoe orang jang baroe dateng. Ternjata ia itoe ada saorang jang bertoeboeh lima kaki tingginja, moekanja itam dan tangannja menengteng satoe golok; tapi ini orang ada make djenggot dan koemis pendek. Orang ini boekan laen dari Tio Houw, jang itoe waktoe madjoe menerdjang pada Jan Hoei.

„Apa kae ini Pak Hiap?“ menanja itoe pendjahat.

Tio Houw jang berdjalan sama Thio Liong, koetika sampe di depan pintoe roemahnja Pek Kiok Hwa, iaorang tida dapet liat pada itoe kadoewa soedara Heng, malah Pang Jan poen tida kaliatan mata-idoengnja. Samentara itoe orang-orang jang mendjaga pintoe depan, lantaran tadi pergi mengoeber Pang Jan tida katemoe, itoe waktoe soeda pada balik kombali dengan tida brentinja mengoetoe dan menggroetoe. Tatkala Thio Liong dan Tio Houw sampe di depan pintoe, marika lagi pada berdoedoek di bangkoe sembari bitjaraken itoe oeroesan.

„Itoe manoesia tjetjongornja seperti satoe bangsat dan boekannja orang baek-baek,“ kata saorang.

„Ja, betoel; tjoema heran sekali ka mana ia soeda mengilang begitoe poenja tjepat,“ kata laen kawannja.

Itoe waktoe marika dapet liat Thio Liong dan Tio Houw berdiri di sitoe sembari melongok ka dalem pintoe. Doewa-doewa dandanannja seperti orang gagah dengan di pinggangnja masing-masing ada tergantoeng satoe golok.

„Kae berdoewa mentjari siapa?“ menanja itoe toekang djaga pintoe.

Tio Houw jang kasar selamanja tida bisa bitjara haloes dan manis.

„Apa kae mae perdoeli ake mae tjari siapa?“ kata ia dengan ketoes.

„Ini hari banjak sekali terdjadi perkara-perkara aneh,“ kata itoe pendjaga pintoe sembari golengken kapala.

„Hei, apa kae tida mae adjak kita berdoedoek di atas

itoe bangkoe?" menanja lagi Tio Houw.

„Och, kaloe kae mae doedoek di sini, sama-sekali tida ada halangannya.“

Mendadak dari sebelah dalem kadengeran soewaranja Pang Jan jang memaki kalang-kaboetan.

„Lo-sie,“ kata Thio Liong, „di dalem orang soeda bertempoer.“

Tio Houw dengen tida berkata satoe apa, lantas sadja berlompat masoek ka dalem pintoe, Itoe pendjaga pintoe mae menjekal padanja tapi loepoet Tio Houw lantas menjaboet goloknja. Soeda tentoe sadja tida ada satoe orang jang brani mendekati padanja. Sebaliknya iaorang mae menjega pada Thio Liong, jang djoega lantas menghoenoes goloknja, hingga itoe kawan an boedjang pada moendoer lantaran katakoetan.

Koetika Thio Liong berpaling ia dapet liat Tjhio Peng dan Tian Tjiauw mendatengin. „Tjhio soe-lo-ya,“ kata ia, „lekasar, di dalem soeda bertempoer.“

„Baek, kita-orang lantas dateng,“ saet Tjhio Peng. „Kae boleh djalan doeloan.“

Begitoelah Thio Liong lantas masoek ka dalem. Koetika ia masoek ka dalem pintoe tembok boender, Tio Houw poenja golok soeda kena dibikin poetoos oleh pedangnja Jan Hoei. Sebab pada waktoe Pang Jan bilang goeroenja dateng, itoe pendjahat liat romannja Tio Houw tida mirip sama Pak-hiap dan koetika ditanja, Tio Houw dengen pendek bilang: „Betoel,“ sembari menjerang sama iapoenja golok. Pek Kiok Hwa tida mae ambil perdoeli betoel atawa boekan Pak-hiap, ia lantas tjeba adoeken sedikit moeloet pedangnja pada blakangnja Tio Houw poenja golok. Tapi dalem sa'at itoe djoega, Tio Houw poenja golok djadi terpoetoos doewa. Itoe pendjahat dengen satoe kali balikin telapan tangannja membatjok ka djoeroesan kapalanja Tio Houw dan kaloe boekannja ia kaboeroe kelip, tentoelah boekannja iapoenja topi jang djadi terpoetoos doewa, hanja iapoenja kapala jang terbelah mendjadi doewa kepang. Tio Houw lantas

merat dengan kaget dan takoet dan Jan Hoi mengoeber dari sebelah blakang.

„Nah, inilah dianja baroe betoel-betoel akoe poenja goeroe!” berseroeh Pang Jan.

Pek Kiok Hwa kombali djadi kaget. Ia liat Thio Liong moekanja koening dan memake pakean dari soetra blao, sedeng di moekanja ada memake koemis dan djenggot jang tida terlaloe pandjang dan tangannja ada menengteng satoe golok.

„Apa betoel kae ini Pak-hiap?” menanja Pek Kiok Hwa.

„Akoe Thio Liong,” djawabnja itoe orang jang ditanja.

„Semoewanja tida lebih dari manoesia-manoesia jang tida ada goenanja,” kata Pek Kiok Hwa dengan bersenjoem ewa.

Thio Liong lantas membatjok sama goloknja dan Jan Hoi lantas menjamboet sama iapoenja pedang.

„Eh, itoe pendjahat poenja sendjata ada barang wasiat,” berseroeh Pang Jan, moesti djaga djangan sampe kena beradoe sama kae poenja golok.”

Thio Liong boeroe-boeroe tarik poelang iapoenja sendjata. Mendadak dari sebelah loewar ada soewara orang berseroeh: „Hei, pendjahat boesock, djangan oendjoek tingka koerang-adjar! Hajolah lekasan menjerah boewat diringkoes!”

Ampir dalem sa'at itoe djoega ada berlompat masoek doewa orang, jang satoe tinggi dan jang satoe lagi kate. Pek Kiok Hwa liat jang tinggi romannja tjakap, halisnja kerang, idoengnja mantjoeng, djidatnja lebar dan kadoewa matanja mengaloewarken sorot tadjam, sedeng di tangannja ada mamegang satoe pedang bermoeloet doewa (tadjamnja di depan dan blakang) jang mengaloewarken tjahaja gilang-goemilang dan hawanja membikin orang djadi mengkirik. Samentara orang jang toeboenja kate, badannja belon tjoekeop lima kaki tingginja, moekanja koeroes seperti orang sakit, tapi kadoewa matanja mengaloewarken sorot jang berkoewasa. Sedang di tangannja ada mamegang satoe sendjata tadjem tjagak tiga dari koeningan.

Pek Kiok Hwa lantaran kena diakalin bebrapa kali dan

sekarang meliat romannja Tjhio Peng jang begitoe koeroes kering, dalem hatinja sangat memandang enteng. Tapi ampir dalem sa'at itoe djoega Pang Jan berseroeh lagi sembari berlompat-lompat seperti satoe anak ketjil.

„Aja, aja, bagoes, bagoes sekali!" kata ia. „Pek Kiok Hwa sekarang kaoe katemoeken kaoe poenja goeroe. Pak-hiap tida dateng, tapi Lam-hiap soeda sampe. Tian Hou-wie taydjin, Tjhio Hou-wie taydjin, ini dianja Pek Kiok Hwa dan akoe harep sadja djangan kasiken ini djahanam jang berhati kedjam dan bocas sampe bisa melolosken dirinja. Tadi ia soeda loekain iapoenja doewa soetee, jang satoe dikorek bidji matanja dan jang satoe lagi dikoetoengin ampat djeridjinja."

Pek Kiok Hwa mendenger itoe omongan, dalem hatinja merasa sanget mendongkol pada Pang Jan dan berkata pada diri sendiri: „Kaloe sadja akoe bisa beroleh kamenangan, tentoelah akoe aken tjingtjang ini manoesia sampe antjoer leboer, baroelah akoe merasa poewas di hati. Tadi ia bilang Pak-hiap, sekarang ia bilang lagi Lam-hiap, sabentar lagi tentoelah Song-hiap jang dateng. Boewat sekarang akoe tida maoe ambil perdoeli siapa djoega jang dateng, akoe maoe labrak dengen tida berlakoe soengkan lagi."

Tjoema sajang satoe kali ini dengen sasoenggoenja ia kena pegang bara. Koetika Tiam Him Hoei membatjok ka djeroesan batok kapalanja, Jan Hoei lantassadja goenaken iapoenja pedang wasiat boeat menangkis sakeras-kerasnja. „Trang!" begitoeolah kadengeran dan berbareng dengen itoe di' atas oedara ada banjak berlompat jang seperti bintang-bintang terpentar sana-sini. Dalem bebrapa lamanja masi kadengeran soewara mengaoengnja itoe doewa pedang jang beradoe. Hal mana soeda membikin itoe dnewa orang djadi sanget terprandjat. Doewa-doewanja berlompat kaloewar dari kalangan boewat mameriksa masing-masing poenja pedang. Tian Him Hoei mendapat kanjataan jang iapoenja pedang tida koerang satoe apa, tapi koetika Jan Hoei preksa iapoenja sendjata, iapoenja soemangat boleh dibilang soeda ter-

bang tigaperampatnja. Sebab iapoenja moeloet pedang telah djadi somplak sabesarnja beras!

Hatinja Pek Kiok Hwa sanget djengkel dan merentak. Sebab itoe Tji-tian-kiam ada satoe barang wasiat jang djarang ada dan biarpoen ada oewang djoega tida ada tempat beli. Sedari iapoenja ajah, Jan Tjoe Tok, koetika maoe menoetoe mata pasrahken itoe sendjata padanja dengan wanti-wanti mamesen padanja begini: „Ini pedang kaloe bisa tetap dalem kaoe poenja tangan, tentoelah kaoe poenja diri bisa tinggal selamat, tapi kaloe ini pedang mendapat karoesakan apa-apa, kaoe poenja djiwa bakal terantjem bahaya besar.” Tidalah heran djika itoe waktoe hatinja merasa sangat djengkel dan katakoetan.

Itoe doewa pedang jang sama-sama ada mendjadi barang wasiat, mengapa koetika beradoe tjoema Tji-tian-kiam sadja jang mendapat karoesakan. Sebab itoe Tji-tian-kiam terbikin di djeman ahala Tjin (sasoedanja Sam Kok), sedang Tjian Tjiauw poenja Kie-koat-kiam terbikin di djeman Tjiangkok dan dari sebab jang terseboet blakangan oemoernja lebi toewa, maka Pek Kiok Hwa poenja pedang tida tahan beradoe sama Tian Tjiauw poenja hingga mendapat itoe sedikit karoesakan.

FATSAL XXIII

Sekarang Tian Tjiauw lantaran mendapat taoe bahoewa iapoenja pedang ada lebi koewat dari pedangnja iapoenja tandingan, dengan hati lega ia lantas kaloewarken iapoenja sa'antero ilmoe kapandean silat. Sedang Tjhio Peng di sebelah pinggiran membantoe menjerang sama iapoenja sendjata Toesoekan, jang djoega digeraken dengan tjepat dan bagoes. Tapi Tjhio Peng jang tjerdik tida madjoe bertanding hadep-hadepan sama Pek Kiok Hwa, hanja ia meliatin Tian Him Hoei jang lagi bertaroeng sama Pek Kiok Hwa. Pada saban kali Jan Hoei mengasi koetika kosong, lantas sadja ia kasi kerdjia iapoenja Toesoekan. Sedang iapoenja serangan tida ditoedjoeken pada bagian sebelah atas, hanja meloeloe ditoedjoeken ka tiga djoeroesan di sebelah bawah.

Tapi ternyata Pek Kiok Hwa poenja ilmoe silat ada tjoe-koep tinggi. Itoe waktue biar poen ia bertanding sama doewa orang jang ilmoenja tida lebih rendah dari ianja, toch ia melajanin dengan adem dan sekikit poen tida mengoendjoe-koep roepa jang keder. Pada Tian Him Hoei poenja serangan, ia tida maoe kasiken sendjatanja beradoe. Ia bersilat dengan sanget hati-hati sekali; tapi ia mentjari koetika baek boewat membikin poetoes Tjhio Peng poenja Toesoekan. Tjoema sadja Tjhio Peng sendiri terlebih lagi berhati-hatinja. Ia bibin penjerangan dengan maksoed bikin ripoeh pada moesoeh, tapi paling teroetama ia djaga djangan sampe sendjatanja kena dibikin roesak oleh pedangnja iapoenja moesoeh. Dengan begitoe, Pek Kiok Hwa poenja niatan djadi sia-sia sadja.

Jan Hoei pikir lama-kalamahan, tentoe sekali ia bakal terdesek dan kena dikalahken. Maka dalem sa'at itoe djoega ia lantas seroehin boedjang-boedjangnja boewat dateng membantoe padanja. Itoe kawanana boedjang lantas pada pergi mengambil golok dapoer, patjoel, toengket, tapalan pintoe dan apa sadja jang bisa digoenaken sabagi sendjata. Tapi Pang Jan lebih siang soeda berlompat toeroen dari atas gen-

teng dan minta itoe golok jang dipegang oleh Thio Liong, jang lantas goenaken boewat memotong tali-tali jang mengikat pada Heng Djoe Liong dan Heng Djoe Houw. Kamoe-dian ia minta Thio Liong dan Tio Houw menggendong pada itoe doewa soedara Heng.

„Shako,“ kata Tio Houw, „kaoe menggendong Liong dan akoe menggendong Houw, djadinja Liong sama Liong dan Houw sama Houw.“

„Ach, pada waktoe begini kae mae membanjoli!“ kata Pang Jan.

Koetika Pang Jan mae anter itoe empat orang kaloewar, ditjegah oleh itoe kawan boedjang jang soeda balik kombali dengan membawa sendjata. Marika memoekoel kalangkaboetan sama tapalan pintoe, pikoelan dan sebaginja. Kaloe mae dibitjaraken Pang Jan poenja ilmoe silat, apabila berhadapan sama saorang jang mempoenjai ilmoe kapandean tinggi, soeda tentoe sadja tida ada goenanja, tapi kaloe ia moesti bertanding sama itoe kawan boedjang, tida berbedasabagi satoe harimau mengamoek di antara kawan domba. Maka dalem sedikit sa'at sadja ia soeda amoek itoe kawan boedjang sampe toempang-sioer; ada djoega jang lantas djiwanja melajang ka acherat; ada djoega jang mendapet loeka berat atawa poen enteng. Achirnja tida ada lagi barang satoe jang brani menjegah padanja.

Pang Jan anter itoe empat orang kaloewar dari itoe pintoe tembok boender teroes kaloewar sampe di pintoe depan. Itoe orang-orang jang tadi mendjaga, lebih siang soeda pada maboer entah kamana. Sasampenja di loewar pintoe Pang Jan liat itoe pasoeakan negri soeda mendatengin. Maka ia lantas balik masoek lagi ka dalem boewat membantoein pada Tian Him Hoi dan Tjhio Peng. Pek Kiok Hwa meliat ini orang bawel dateng kombali, hatinja merasa sanget mendongkol; tapi itoe waktoe ia denger di sabelah loewar ada soewara riboet-riboet dibarengin oleh orang banjak poenja soewara s oerakan jang tida berbedasabagi goenoeng roeboeh kerasnja. Jan Hoi lantas taoe bahoewa ini

satoe kali ia bakal tjilaka, kaloe sadja ia tida boeroe-boeroe oeloer kakinja boewat maboer.

Koetika mendapet koetika kosong ia poera-poera menoesoek ka djoeroesannja Tjhio Peng, jang lantas berkelit moendoer. Pek Kiok Hwa lantas goenaken ini koetika baek boewat pandjangken tindakannja kaloewar dari kalangan dan teroes maboer dengan keras.

„Hei, djahanam, kaeo lari!” berseroeh Pang Jan. „Kedjar padanja!”

Semoewa orang mengedjar pada itoe pendjahat jang merat. Tian Tjiauw mengoeber paling doeloe dan Tjhio Peng di blakangnja; tapi Pang Jan jang baroesan berseroeh mengedjar, tjoema moeloetnja sadja bikin riboet, tapi kakinja tida bergerak. Jan Hoei koetika lari sampe di pintoe tembok boender, lantas berpaling meliat ka blakang. Ia lantas dapet liat Tjhio Peng dan Tian Tjiauw jang mengedjar padanja. Pek Kiok Hwa lantas pindahken itoe pedang jang ia pegang ka tangan kirinja, sedang iapoenja tangan merogo ka dalem iapoenja kantong pio sembari teroes berlari. Dengan mendadak ia balikin badannja dan ajoen tangan kanannja malepaskan iapoenja sendjata resia itoe.

Tian Tjiauw jang mengoeber di sebelah depan, boekannja anak kemaren doeloe, dengan tjepat ia berkelit ka samping. Sedang Tjhio Peng jang mengedjar di sebelah blakang tida bisa meliat terang ka depan, sabagitoe lekas ia meliat Tian Him Hoei berkelit ka samping, ia poen toeroet berkelit njamping. Tjoema sadja itoe pio jang ditoedjoeken ka tenggorokannja Tian Him Hoei, lebih siang soeda sampe dan lantaran jang didjoedjoe lebih siang soeda menjingkir, itoe pio lantas sadja mengenaken boengkoesan kapalannja Tjhio Peng, jang lantas djadi menggrowak satoe lobang bekas djalan liwatnja itoe sendjata resia. Beroentoeng tida me-lockaken iapoenja koelit kapala.

„Ach, soenggoe berbahaja sekali, Tian Toatee.” kata Tjhio Peng. „ampir sadja akoe terkena orang poenja sendjata resia. Sekarang lebih baek kita mengedjar dengan djalan

berendeng. Sebab kaeo jang djalan doeloean bisa meliat moesoeh poenja gerakan dengan terang, sebaliknya kaeo jang berada di sebelah blakang tida bisa meliat satoe apa. Baroesan kaloe boekannja kaeo poenja toeboeh lebih kate, nistjaja kaeo soeda mendapet tjilaka."

Tapi iaorang sembari bitjara kakinja bakerdja teroes. Tian Him Hoei lantaran Pek Kiok Hwa goenaken iapoenja sendjata resia, ia djadi inget sama ia sendiri poenja. Sembari mengoeber ia bikin betoel pekakasnjn iapoenja sioetjhie. Koetika ia gerakin sebelah tangannja, kadengeran satoe soewara teng! dan itoe sioetjhie soeda menantjap di tapalan pintoe. Sebab Pek Kiok Hwa jang itoe waktoe soeda lari sampe di dekat pintoe depan, poen senantiasia berlakoe hati-hati, biar poen ia merat tapi saban-saban menoleh ka blakang. Koetika ia meliat Tian Lam-hiap kadoewa tangannja dirangkepken, ia soeda mendoega orang maoe melepasken sendjata resia. Dengan sesoenggoenja djoega satoe kali Lam-hiap angsoerken tangannja, ia rasaken satoe hawa dingin menoejdjoe ka tenggorokannja, dengan tjepet ia berkelit, maka itoe sioetjhie djadi mengenaken itoe tapalan pintoe.

Pada sasoedanja ia kasi liwat itoe sioetjhie, teroes ia berlompat ka loewarnja pintoe depan. Fernjata di sitoe soeda berkoempoel banjak sekali orang dengan mengoeroeng pada itoe pagar tembok pekarangan roemah. Semoea lantas pada berseroeh, sabagitoe lekas iaorang meliat itoe pendjahat berlompat kaloewar: "Nah, ini dianja soeda kaloewar! Ini pendjahat soeda maboer kaloewar!"

Itoe waktoe Thio Kan dan Ho Hoei menoeenggoe di kadoewa pinggirannja pintoe, sedang Pang Tjongpeng menoeenggoe di tengah-tengah. Jan Hoei liat itoe orang-orang tjoema memake sadja pakean biasa dengan kapala diboengkoes sama kaen biroe dan semoewanja bersendjata pendek. Sedang itoe Pang Tjongpeng jang berdiri di sebelah depannja memake satoe boengkoesan kapala warna gambir gelap dan pakean ringkes. Iapoenja warna moeka seperti emas angoes dan di tangannja ada mamegang satoe Tiok-tjat-pian

dari wadja, jang kira-kira sabesarnja telur bebek. Ia berdiri di sitoe tida berbeda sabagi satoe harimau jang lagi menoenngoe korbannja. Jan Hoei doega tentoelah ini ada itoe ponggawa jang mengepalai itoe pasoean negri jang menjamar.

Perkara jang Pek Kiok Hwa paling takoetin, di kadoewa pinggirannja itoe Tjongpeng ada berdiri doewa poeloeh orang jang mamegang gaetan bergagang pandjang; tapi tida bisa tida ia moesti madjoe djoega, bila ia maoe melolosken diri. Pada sabelonnja ia sempet bergerak, Thio Kan dan Ho Hoei soeda madjoe menjerang, jang satoe goenaken sapaasang „gan“ dari koeningan dan jang laennja memake satoe toja. Pek Kiok Hwa pikir kaloe moesti melajanin ini doewa orang doewa atawa tiga djoeroesan, orang jang mengedjar padanja tentoe kaboeroe sampe, maka ia berniat bikin pendek ini pertandingan. Sabagitoe lekas sendjatanja itoe doewa orang sampe, lantas sadja ia tangkis sama pedangnja dan bikin poetoes itoe doewa orang poenja sendjata. Berbareng dengan itoe ia goenaken satoe tipoe „Soen-tjhioe-toei-tjioe.“ Srat! Thio Kan poenja lengan telah djadi poetoes dan koetika ia tarik poelang pedangnja ia sabet bikin koetoeng Ho Hoei poenja boengkoesan kapala.

Pang Tjin Kang meliat iapoenja doewa panglima telah diloekain begitoe roepa, soeda tentoe sadja mendjadi sangat goesar: dengan tjepat ia ajoen iapoenja pian wadja, menjerang pada Jan Hoei, orang siapa meliat itoe Tjongpeng poenja sendjata begitoe besar dan berat, djadi tida brani menangkis sama iapoenja pedang, hanja ia lantas goenaken satoe tipoe „Ouw-liong-djip-tong“ boewat singkirken itoe serangan. Tapi baroe sadja ia maoe bales menjerang sama pedangnja, itoe doewapeloeh soldadoe jang mamegang gaetan bergagang pandjang, dengan berbareng soeda madjoe menggaet padanja. Pek Kiok Hwa lantas sabetin iapoenja pedang pada sasoeatoe gaetan jang dateng dekat padanja, dalem sakedjapan mata sadja itoe besi gaetan pada poetoes dan pamegangnja ampir sadja pada djato kasoempat.

Jan Hoei lantas poeter iapoenja pedang dan sasoeatoe orang jang terkena iapoenja sendjata, kaloe boekannya binasa tentoe mendapat loeka berat. Dengan gampang sadja ia bisa menerobos kaloewar dari kepoengan. Tatkala ia berlari sampe di moeloet djalan kaloewarnya itoe boekit, kembali ia bertemoe sama itoe kawan kapala-oppas dan orang-orangnja, tapi soeda tentoe sadja iaorang tida bisa menjega Jan Hoei poenja perdjalan. Boekan sedikit di antaranja jang kena dibikin loeka dan djato terbanting.

Sabagiteo lekas itoe pendjahat sampe di sabelah loewarnya itoe An-louw-san, dalem hatinja berpikir, ka mana ia moesti pergi; apa ka Tjioe-kee-hang atawa ka Lioe-kee-eng; tapi pada sabelonnja ia bisa mendapat pikiran teiap, mendadak dari sabelah blakang ada kadengeran soewara tindakan orang-orang jang memboeroe. Apaboleh-boewat ia lantas pandjangan lagi tindakannya merat dengan menoeroeti sapandjangnja pinggir goenoeng djoeroesan Oetara. Koetika ia biloek lagi ka Barat, ia liat di atas goenoeng ada sinar api jang mengkobarkobar dan asap jang bergoeloeng-goeloeng ka atas.

„Wah, tjilaka!“ mengeloe ia. „Tentoelah akoe poenja sarang soeda djadi moesna dibakar. Ini semoewa dasaran itoe doewa binatang Heng Djoe Liong dan Heng Djoe Houw poenja gara-gara. Nanti kaloe akoe bisa dapet tangkap itoe doewa binatang, tentoe akoe maoe iris-iris iapoenja badan sampe mampoes, baroe akoe poenja hati merasa poewas.“

Satelah ia berdjalan doewa lie djaoenja, ia soeda sampe di depan pintoenja Lioe-kee-eng. Di sabelah depannja itoe tempat ada banjak toemboe poehoen „lio“ dan jang poenja bernama Lioe Ong, tergelar Tjeng biauwsin. Sebab iapoenja kebon-kebon jang ditanemin sajoeran dan laen-laen, sama-sekali tida perloe memake pendjaga, tapi bila ada orang jang dateng mentjoeri iapoenja sajoeran atawa tetaneman laen, dengan lantas sadja Lioe Ong bisa tangkap pentjoerinja, maka semoewa pentjoeri tida ada satoe jang brani dateng mentjoeri ka dalem iapoenja kebon dan ini djoega se babnja maka ia mendapat itoe gelaran Tjeng-biauwsin.

Doeloenja Lioe Ong poen ada satoe perampok dan blakangan lantaran soeda mempoenjai djoega banjak harta, ia lantas tjoetji-tangan dan tida djadi brandal lagi. Tapi sajang biar poen mempoenjai banjak harta, ia tida mempoenjai anak, sedang oemoernja soeda ampatpoeloeh tahun, koetika ia brenti mendjadi begal. Blakangan iapoenja istri melahirken satoe anak prampoewan, tapi koetika beroemoer delapanbelas tahun dikasi nikah sama saorang she Song, tapi tida lama itoe anak poen meninggal doenia.

Belon lama koetika Lioe Ong tjoekoep beroemoer anempoeloeh tahun, ia bikin satoe pesta sehjdjit. Pek Kiok Hwa memangnja tida kenal padanja tjoema satoe sama laen sering denger nama. Itoe waktoe Pek Kiok Hwa bersama Tjioe Liang dari Tjioe-kee-hang, dateng ka roemahnja Lioe Ong boewat memberi selamat dengan membawa barang bingkisan jang berharga. Moelai dari itoe waktoe iaorang djadi berkenalan satoe sama laen, malah sadari Pek Kiok Hwa dateng memberi selamat hari tahonnja Lioe Ong, toewan roemah menahan padanja boewat tinggal menginep sampe bebrapa belas hari lamanja dan saban hari toewan roemah soegoehi tetamoenja barang santapan dan minoeman jang lezat dan wangi. Achirnja itoe doewa orang lantas mengangkat soedara. Tadi Jan Hoei pikir maoe pergi ka roemahnja Tjioe Liang di Tjioe-kee-hang, tapi lantaran di sana tempatnja terlaloe ketjil, lagian sekarang ia lagi dioeber-oeber orang, ia sanget koewatir pada sabelonnja sampe, sebaliknya ia soeda kena tertangkap. Maka ia rasa paling baek maboer ka Lioe-kee-eng jang lebi deket, barangkali sadja bisa lolos. Inilah sebabnja ia dateng ka roemahnja Lioe Ong.

Kabatoelan itoe waktoe Lioe Ong djoestroe lagi berdiri di depan pintoe roemahnja memandang ka djoeroesan Louwan-san, sebab koetika ia lagi doedoek mengangoer dalem iapoenja kamar-batja, iapoenja boedjang masoek kasi taoe, bahoea entah sebab apa di dalem Louwan-san kadengeran soewara riboet seperti orang lagi berperang, hal mana soeda membikin ia djadi sanget terkedjoet dan bosroe-boeroe ka-

loewar dari pintoe depan boewat meliat ka djoeroesan itoe boekit. Tapi itoe waktoe boekan sadja kadengeran soewara bergoeroeh sabagi orang lagi berperang, malah ada kaliatan sinar api jang mengkobarkobar dan asepe bergoeloeng-goeloeng naek ka atas langit. Dan itoe waktoe angin menioep dari djoeroesan Timoer-selatan, sedang letaknja Lioe-kee-eng djoestroe berada di Barat-oetara, kira doewa lie dari sebelah blakangnja itoe Louw-an-san jang tinggi, maka soewara dari itoe boekit bisa kadengeran dengan njata, apalagi itoe sinar api jang mengkobarkobar begitoe besar.

Djoestroe pada waktoe Lioe Ong maoe soeroe orangnja pergi tengok dan tjari taoe ka Louw-an-san, koenjoeng-koenjoeng dari sebelah depan ada mendatengin Pek Kiok Hwa dengan mengoendjoek sikap goegoep dan bingoeng, beroelang-oelang ia menoleh ka djoeroesan blakang. Sedang di sebelah blakang Lioe Ong liat beroentoen-roentoen ada bebrapa banjak orang jang mengedjar. Tjeng-biauw-sin ada saorang tjerdik dan bisa berpikir dengan tjepat, dalem sa'at itoe djoega ia soeroe orangnja pergi menoetoepe pintoe depan. Iapoenja roemah jang besar dan loewas, di dalem pintoe depan ada ditaro doewa bangkoe, sedang di sebelah loewarnja itoe pintoe depan ada terletak doewa bangkoe batoe model tahang. Lebih doeloe ia soeroe orangnja pindhaken itoe doewa bangkoe-batoe dan koetika Pek Kiok Hwa sampe di depan pintoe, Lioe Ong lantas sadja toentoen itoe pendjahat masoek ka dalem roemah dan soeroe orang lantas tapal itoe pintoe depan. Koetika Pek Kiok Hwa maoe djalanken kahormatan, Lioe Ong lantas menjegah.

„Ini waktoe tida ada tempo boewat mendjalanken peradatan,” kata ia. „Harep sadja kae soeka lekasan tjeritaken soeda terdjadi perkara apa.”

Pek Kiok Hwa dengan ringkes lantas toetoeerken iapoenja oeroesan. Lioe Ong berpikir sakoetika lamanja, kamoedian ia lantas berkata: „Ini oeroesan moesti diatoer begini dan begitoe, baroelah bisa mendjadi beres.”

Pek Kiok Hwa beroelang-oelang manggoetken kapala

dan berkata: „Itoe akal bagoes sekali. Tjoema sadja djadi membikin soesa pada Twako.” Sahabisnja berkata, ia lantas berloetoet dan maoe mendjoera.

Lioe Ong lantas menjekal lengannja Jan Hoei dan berkata: „Kita jang satoe sama laen mendjadi soedara-angkat, tida perloe moesti mendjalanken itoe peradatan.”

Kamoedian ia lantas panggil boedjangnja boewat menganter Pek Kiok Hwa pergi ka dalem. Di laen fihak ia panggil lagi satoe boedjang laen, pada siapa ia bitjara bisik-bisik. Itoe boedjang lantas bilang baik dan pergi melakoeken pesenannja iapoenja madjikan. Tida antara lama kamoedian dari sabelah depan ada kadengeran soewara riboet-riboet dan satoe boedjang masoek mengasi taoe: „Wan-gwee, iaorang semoewanja soeda dateng dan sekarang lagi mengetok pintoe depan.”

„Kaoe orang djangan goegoep,” kata Lioe Ong.

Sahabisnja berkata ia sendiri pergi kaloewar boewat memboekain pintoe, dalem sa'at itoe djoega ia berhadep-hadepan dengan Tian Lam-hiap dan Hwan-kang-tjie.

„Apa kaoe ini ada toewan roemah?” menanja itoe doewa orang dengan berbareng.

„Betoel, tida salah,” djawab Lioe Ong sembari manggoetken kapala. „Akoel poenja nama Lioe Ong. Tjoema sadja akoel belon mendapet taoe toewan berdoewa poenja she dan nama jang moelia dan dateng ka sini dengan membawa begitoe banjak orang, maodel ada oeroesan apa?”

„Kita berdoewa ada Gie-tjian Sam-pin Hou-wie Tjiangkoen,” djawab Tjhio Peng. „Di sabelah blakang masi ada kaoel poenja Tihoe dan Tjongpeng jang berkoewasa di ini tempat. Dan kita semoewa menerima prentah firmannja keizer boeat menangkep satoe pendjahat, sedeng itoe pendjahat telah masoek ka dalem kaoel poenja roemah. Hajo lekasan menjingkir kasiken kita-orang liwat boewat menangkap itoe pendjahat.”

Lioe Ong lantas menjega sama kadoewa tangannja.

„Nanti doeloe,” kata ia. „Dalem kita poenja roemah sama-

sekali tida ada pendjahat."

"Och, kaeo djangan menjangkal, sobat," kata Tjhio Peng. "Baroesan dari kadjaoehan dengan njata akoe liat itoe pendjahat masoek ka pintoe depannja ini roemah, tjoema lantaran ka'alingan sama itoe gombolan poehoen lioe, djadi kita tida bisa meliat dengan njata, apa ia teroes masoek ka sini atawa tida."

Lioe Ong makanja poengkir Jan Hoei masoek ka roemah, perloe boewat melambatkan tempo, agar Pek Kiok Hwa bisa maboer ka blakang. Tapi Tjhio Peng jang tjerdik tida maoe kena diakalin begitoe roepa. Dalem sa'at itoe djoega ia soeroe semoewa soldadoe mengoeroeng sakitarnja itoe roemah dan tida maoe meladenin mengadoe lida sama Lioe Ong. Dalem sakedjapan sadja itoe roemah sakiternja soeda dikoeroeng oleh itoe doewa ratoes pasoeakan negri jang menjamar.

"Tida perdoeli apa itoe pendjahat ada atawa tida dalem kaeo poenja roemah," kata lagi Tjhio Peng, "tapi kita moesti bikin penggledahan djoega dan nanti apabila kadapatan itoe bangsat berada dalem kaeo poenja roemah, tentoelah kaeo sendiri aken tida terbebas dari kadosahan."

"Itoelah memang dengan sapantasnja," djawab Lioe Ong: "tjoema sadja kaloe kadoewa loya maoe bikin penggledahan dalem akoe poenja roemah, akoe memoehoen soepaja diloesken akoe poenja satoe permintahan: berdoewa loya sadja jang masoek menggledah ka dalem, sedeng itoe orang jang laen-laennja djangan di'idjinken masoek, sebab akoe koewatir barang-barangkoe aken mendjadi banjak jang hilang."

"Itoelah tida ada halangannja," djawab Tjhio Peng, jang lantass kasi prentah itoe kawan an soldadoe boleh mendjaga sadja dengan awas di sabelah loewar.

FATSAL XXIV

Tian Tjiauw dan Tjhio Peng lantas masoek ka dalem dan koetika iaorang ampir sampe pada satoe pedengan angin, mendadak marika dapet liat pada Pek Kiok Hwa, jang lari ka dalem. Itoe doewa Hou-wie lantaran pikirannja ditoedjoe-ken sa'anteronja pada Pek Kiok Hwa, djadi tida tjoeriga di sabelah dalem orang sediaken djebakan. Iaorang tjoema inget mengoeber sadja pada itoe pendjahat, mendadak dari kadoewa pinggirana ada terangkat satoe tambang jang mendjiret pada itoe doewa orang poenja kaki.

„Ach, tjilaka akoe!“ berseroeh Tjhio Peng, jang toeboenja djadi sempojongan ka depan, tapi ampir dalem sa'at itoe djoege ia lantas berlompat dan teroes lari lagi ka kamar tetamoe.

Sebab dari satadian Tian Him Hoei poenja pedang masi teroes dipegang dalem tangannja, maka pada waktoe itoe tambang mendjirat pada iaorang poenja kaki, dengan tjepat ia bikin poetoes itoe tambang. Berbareng dengan itoe, kadengeran soewara gedeboekannja itoe orang-orang jang memegang itoe tambang di kadoewa pinggirana lantaran pada djato kasoempet. Inilah sebabnja itoe doewa orang tjoema sempojongan sadja, tapi tida teroes djato kasoempet.

„Bangsat, koerang adjar!“ mengoetok Tjhio Peng. „Ampir sadja kita terkena dalem kae orang poenja djebakan.“

Pek Kiok Hwa merasa sanget gemas iapoenja tipoe tida bisa berhasil. Boeroe-boeroe ia berlari ka loear dari itoe kamar tetamoe sembari mengaloewarken iapoenja pio dari kantongnja. Ia sambitken itoe sendjata resia ka djoeroesannja Tian Tjiauw, tapi soeda tentoe sadja tida bisa dapetken maksoednja, sebab lebih siang Tian Him Hoei soeda berkelit. Ini satoe kali Tjhio Peng tida maoe berdiam lagi di sabelah blakangnja Tian Him Hoei, maka itoe waktoe ia poen bisa berkelit boewat kasi liwat sendjata resianja Pek Kiok Hwa.

(Ada samboengannja).

